



元和郡縣圖志六

ル 5
136
6



元和郡縣圖志卷第二十五

唐 李吉甫 撰

江南道一

新續文
有物那

浙西觀察使

潤州

丹陽 開元戶九萬一千六百三十五
元和戶五萬五千四百

鄉一百
鄉八十

墾田六千七百二十七頃

今為浙西觀察使理所

管州六 潤州 常州 蘇州 杭州 湖州 睦州

縣三十七 都管戶三十一萬三千七百七十二

墾田五萬七千九百三十二頃

本春秋吳之朱方邑始皇改為丹徒漢初為荆國劉賈所封後漢獻帝建安十四年孫權自吳理丹徒號曰京城今州是也十



已
136
6

六年遷都建業以此為京口鎮按州理或古名京城說者以為
荆王劉賈嘗都之或曰孫權居之故名京城今按荆字既不同
又孫權未稱尊號已名為京則兩說皆非也按京者人力所為
絕高邱也亦有非人力所為者若公孫瓚所築易
京是也非人力所為者滎陽京索是也今地名徐陵即此京非
人力所為也京上郡城城前浦口即是京口吳志曰漢獻帝興
平二年長沙桓王孫策創業江東使將軍孫何領兵屯京地是
也吳志又云魏將臧霸以輕船五百敢死萬人襲徐陵攻燒城
塹即吳時或稱京城或稱徐陵或稱丹徒其實一也晉永嘉亂
後幽冀青并兗五州流人過江者多僑居此處吳晉以後皆為
重鎮晉咸和中郗鑒自廣陵鎮於此為僑徐州理所昇平二年
徐州刺史北鎮下邳京口常有留局後徐州寄理建業又為南

兖州後又為南徐州隋開皇九年賀若弼自廣陵來襲陷之遂
滅陳廢南徐州改為延陵鎮十五年罷鎮置潤州城東有潤浦
口因以為名隋氏喪亂杜伏威竊據其地武德三年伏威歸化
六年輔公祏叛復據其地七年平公祏依前置州其城吳初築
也晉王恭為刺史改創西南樓名萬歲樓西北樓名芙蓉樓

州境

東西三百八里
南北一百九十里

八到

西北至上都二千六百七十里
西南至東都一千八百一十里
東南至常州一百七十里
北渡江至揚州七十里
正南微西至宣州四百里

貢賦

開元貢 雜藥 紋綾
賦 絲 紵 布

管縣六

丹徒

丹陽

金壇

延陵

上元

句容

丹徒縣

望

郭下

本朱方地後名谷陽春秋魯襄二十八年齊慶封

奔吳吳與之朱方聚族而居之富於其舊後楚靈王使屈申圍慶封於朱方克之盡滅其族卽此地初秦以其地有王氣始皇遣赭衣徒三千人鑿破長隴故名丹徒

北固山在縣北一里下臨長江其勢險固因以爲名蔡謨謝安作鎮並於山上作府庫儲軍實宋高祖云作鎮作固誠有其緒然北望海口實爲壯觀以理而推固宜爲顧江今闊一十八里春秋朔望有奔濤魏文帝東征孫氏臨江嘆曰固天所以限南北也

蒜山在縣西九里山臨江絕壁晉安帝時海賊孫恩至丹徒戰卒十萬率眾登山鼓譟動地引陣南出欲向京城時宋武帝眾無一旅率所領橫擊大破之山多澤蒜因以爲名

氏父山在縣西北十里晉破苻堅獲氏賊置此山下因以爲名

今土俗亦謂之金山

獸窟山一名招隱山在縣西南九里卽隱士戴顓之所居也

東浦亦謂之潤浦在縣東二里北流入江隋置潤州取此浦爲名也

永興寧陵在縣東南三十五里宋武帝追尊曰孝皇帝諱翹初仕郡爲功曹

丹陽縣望西北至州六十四里本舊雲陽縣地秦時望氣者云有王氣故

鑿之以敗其勢截其直道使之阿曲故曰曲阿武德五年曾於縣置簡州八年廢天寶元年改爲丹陽縣

劉繇城在縣西南二百四十步漢末繇爲揚州刺史揚州舊理壽春已爲袁術所據故繇來建城號令江南眾數萬人後孫策東略繇奔豫章

慶亭壘在縣東四十七里本蘇峻將管商攻略晉陵郗道微以此地東據要路北當武進故遣督護李閔築此拒之今置埭練湖在縣北一百二十步周迴四十里晉時陳敏爲亂據有江東務修耕績令弟諧遏馬林溪以溉雲陽亦謂之練塘溉田數百頃

新豐湖在縣東北三十里晉元帝大興四年晉陵內史張闔所立舊晉陵地廣人稀且少陂渠田多惡穢闔創湖成溉灌之利初以勞役免官後追紀其功超爲大司農

南齊宣帝休安陵在縣北二十八里高帝父也追尊爲宣皇帝高帝道成泰安陵在縣口三十二里

武帝曠景安陵在縣東二十二里

景帝道生永安陵在縣東北二十六里明帝父也追尊爲景皇

帝

明帝鸞興安陵在縣東北二十四里

梁文帝順之建陵在縣口二十五里武帝父也追尊爲文皇帝武帝衍修陵在縣東三十一里貞觀十一年詔令百步禁樵采簡文帝綱莊陵在縣東二十七里

金壇縣緊西北至州一百四十里本漢曲阿縣地隋於此置金山府隋末

亂離鄉人自立爲金山縣武德八年廢垂拱二年又置縣以婺州有金山改名金壇

延陵縣緊東至州一百里晉太康二年分曲阿之延陵鄉置延陵縣蓋

因季子以立名也又漢地理志季子所居在今毗陵本名延陵至漢始改然今縣北見有其祠或當時采地所及其地亦曰連陵

茅山在縣西南三十五里三茅得道之所事具仙經不錄

古神亭在縣西北二十五里初孫策與太史慈遇於神亭卽此地也吳志曰太史慈渡江到曲阿見劉繇會孫策至繇使慈覘輕重獨與一騎卒遇於神亭策從騎十二皆韓當宋謙黃蓋輩也慈便前鬪策刺慈馬得慈項上手戟慈亦得策兜鍪會兩家兵騎來赴遂各解散後策獲慈解縛捉手曰寧識神亭時邪是時卿得我如何慈曰未可量也策乃大笑

上元縣

緊東北至州一百八十里

本金陵地秦始皇時望氣者云五百年

後金陵有都邑之氣故始皇東遊以厭之改其地曰秣陵塹北山以絕其勢及孫權之稱號自謂當之孫盛以爲始皇逮於孫氏四百三十七載考其曆數猶爲未及晉之渡江乃五百二十六年遂定都焉隋開皇九年平陳於石頭城置蔣州以江寧縣屬焉武德三年杜伏威歸化改江寧爲歸化縣九年改爲白下縣屬潤州貞觀九年又改白下爲江寧至德二年於縣置江寧郡乾元元年改爲昇州兼置浙西節度使上元二年廢昇州仍改江寧爲上元縣

鍾山在縣東北十八里按輿地志古金陵山也邑縣之名皆由此而立吳大帝時蔣子文發神異於此封之爲蔣侯改山曰蔣山宋復名鍾山梁武帝於西麓置愛敬寺江表上已常遊於此爲眾山之傑

覆舟山在縣東北一十里鍾山西足地形如覆舟故名宋元嘉中改名玄武山以爲樂遊苑初桓玄作亂使卞範之屯覆舟山西粟餘二萬宋高祖率義師食畢棄其餘糧躬先士卒以擊之範之等一時土崩

牛頭山在縣南四十里山有二峯東西相對名爲雙闕晉氏初過江無闕王導指山鑿兩峯卽此名天闕山

方山在縣東南七十里秦鑿金陵以斷其勢方石山坳居僞是切

所斷之處也

三山在縣西南五十里晉王濬伐吳宿於牛渚部分明日前至三山卽此也

四望山在縣西北八里晉溫嶠伐蘇峻於四望山築壘以逼賊是也

蔡洲在縣西十二里江中晉盧循作亂戰士十餘萬舟艦數百里連旗而下宋高祖登石頭以望循軍初循引向新亭公顧左右失色旣而迴泊蔡洲公曰此成擒耳俄而循大敗而走

淮水源出縣南華山在丹陽湖孰兩縣界西北流經秣陵建康二縣之間入於江初王敦構亂王導憂將覆族使郭璞筮之曰淮水絕王氏滅卽此淮也

玄武湖在縣北十里周迴二十五里

婁湖縣東南五里吳張昭所創溉田數十頃周迴七里昭封婁侯故謂之婁湖宋時爲苑

晉故臺城在縣東北五里成帝時蘇峻作亂焚燒宮室都盡溫嶠以下咸議遷都惟王導固爭不許咸和六年使王彬營造七年帝遷於新宮卽此城也

揚州故理在縣東百步後漢末又理壽春劉繇爲揚州刺史始移理曲阿吳長沙桓王孫策定江東置揚州於建業其州廨王敦及王導所創也後會稽王道子於東府城領州故亦號此爲西州及隋平陳又於石城置蔣州移揚州於江北之江都焉

丹陽郡故城在縣東南五里初爲丹陽內史後改爲尹

石頭城在縣西四里卽楚之金陵城也吳改爲石頭城建安十六年吳大帝修築以貯財寶軍器有成吳都賦云戎車盈於石城是也諸葛亮云鍾山龍盤石城虎踞言其形之險固也

秣陵故縣在縣東南四里本金陵地也秦改爲秣陵

湖孰故縣在縣東南七十里

越城在縣南六里本東甌越王所築也吳王濞敗先趨此城後保丹徒郭璞行於途中贈白衣人袴褶亦此城也

建康故城在縣南三里建安中改秣陵爲建業晉復爲秣陵孝武帝又分秣陵水北爲建業避愍帝諱改名建康

東府城在縣東七里其地西則簡文帝爲會稽王時邸第東則丞相會稽王道子府謝安薨道子代領揚州仍前府舍故稱爲

東府而謂揚州廨爲西州謝惠連祭冥漠君文卽因修此府之城牆所爲也

輔公祏城在縣東七里其地本齊文惠太子苑地也公祏構亂築以爲城其年公祏平城遂毀廢

賀若弼壘在縣北二十里隋平陳弼過江於蔣山龍尾築壘

韓擒虎壘在縣西四里隋平陳樹碑其文薛道衡之詞武德七年趙郡王孝恭平輔公祏樹碑紀功與此碑相對李百藥之詞

吳大帝蔣陵在縣北二十二里

晉元帝睿建平陵明帝紹武平陵成帝衍興平陵並在縣北六里雞籠山

康帝岳崇平陵在縣東北二十里蔣山西南

哀帝丕安平陵在縣北六里雞籠山南

簡文帝昱高平陵孝武帝昌明隆平陵安帝德宗休平陵恭帝
德文冲平陵並在縣東北二十里蔣山西南

宋武帝劉裕初寧陵文帝義隆長寧陵並在縣東北二十二里
蔣山東南

孝武帝駿景寧陵在縣西南四十里巖山

明帝或高寧陵在縣北十九里幕府山東南

陳武帝霸先萬安陵在縣東三十八里方山西北貞觀十一年
詔百步內禁樵采

文帝禕永寧陵在縣東北四十里蔣山東北

宣帝頊顯寧陵在縣南四十里牛頭山西北

梁昭明太子安陵在縣東北五十四里查礪山

晉王導墓在縣西北十四里幕府山西

謝安墓在縣東南十里石子岡北

句容縣緊 東北至 州二百里漢舊縣也晉元帝興於江左為畿內第二

品縣縣有茅山本名句曲以山形似己字故名句曲有所容故
號句容

赤山湖在縣南三十五里

茅山在縣東南六十里

竹里山在縣北六十里王塗所經塗甚傾險行者號為翻車峴
山閒有長澗高下深阻舊說云似洛陽金谷宋武帝初起自京
口至江乘破桓玄將吳甫之於竹里移檄京師即此處也

銅冶山在縣北六十五里出銅鉛歷代采鑄

常州晉陵 開元戶九萬六千四百七十五 鄉一百八十七

禹貢揚州之地春秋時屬吳延陵季子之采邑漢改曰毘陵晉

東海王越謫於毘陵元帝以避諱改為晉陵郡宋齊因之隋開皇九年平陳廢郡於常熟縣置常州因縣為名後割常熟縣入蘇州移常州理於晉陵縣隋亂陷於寇境武德七年平仍舊置常州

州境 東西二百二十里 南北二百九十里

八到 西北至上都二千八百四十五里 西北至東都一千九百八十里 東南至蘇州一百九十里 西南至古宣州五百里 正南微西至湖州私路三百里 西北至潤州一百七十里

貢賦 開元貢 細紵 紅紫二色縹布 紙六十張 紵布

管縣五 晉陵 武進 江陰 無錫 義興

晉陵縣 郭下 本春秋時延陵漢之毘陵也後與郡俱改為晉陵季札所居也墓在本縣北七十里申浦之西

武進縣 郭下 吳大帝改丹徒為武進晉武帝復改武進曰丹徒

別置武進縣於丹陽縣東五十里梁武帝改武進為蘭陵入晉陵垂拱二年又析晉陵西界立武進縣於州理

江陰縣 緊 東南至州五十里 本漢毘陵縣之漑陽鄉晉太康二年置漑

陽縣梁敬帝置江陰縣郡隋開皇九年罷郡縣屬常州

無錫縣 望 西北至州九十六里 漢舊縣也東三十九里有梅里山吳太伯葬處

義興縣 緊 北至州一百二十里 本漢陽羨縣故城在荆溪南晉惠帝時妖

賊石冰寇亂揚土縣人周玘創義討冰割吳興之陽羨并長城縣之北鄉為義興郡以表玘功隋開皇九年平陳廢郡為義興縣

荆溪是周處斬蛟處

蘇州

吳郡

開元戶六萬八千九十三

鄉一百一十八

禹貢揚州之地周時為吳國太伯初置城在今吳縣西北五十里至闔閭遷都於此後為越所并楚滅越而封黃歇於吳秦置會稽郡二十六縣於吳項羽初起殺會稽太守殷通即此也漢亦為會稽郡後漢順帝永建四年陽羨令周喜山陰令殷重上書求分為二郡遂割浙江以東為會稽浙江以西為吳郡孫氏創業亦肇跡於此歷晉至陳不改常為吳郡與吳興丹陽號為三吳隋開皇九年平陳改為蘇州因姑蘇山為名山在州西四十里其上闔閭起臺外郭城云是伍胥所築周迴四十七里州境東西四百四十一里南北四百九十八里八剏西北至上都三千三十里西北至東都二千一百七十里南至杭州三百七十里正南微西至湖州二百一十里

貢賦

東北至海三百三十里西北至常州一百九十里

開元貢 白石脂 蛇牀子 賦 紵 布 元和貢 絲葛十四 白石脂三十斤 蛇牀子三升

管縣七

吳

長洲

嘉興

海鹽

常熟

崑山

華亭

吳縣

望郭下

本吳國闔閭所都秦置縣

太湖在縣西南五十里禹貢謂之震澤周禮謂之具區湖中有山名洞庭山

虎丘山在縣西北八里吳越春秋云闔閭葬於此秦皇鑿其珍異莫知所在孫權穿之亦無所得其鑿處今成深澗

松江在縣南五十里經崑山入海左傳云越伐吳軍於笠澤即此江

長洲縣

望郭下

本萬歲通天元年析吳縣置取長洲苑為名苑在

縣西南七十里

嘉興縣 望北至州一百四十七里 本春秋時長水縣秦為由拳縣漢因之

吳時有嘉禾生改名禾興縣後以孫皓父名改為嘉興縣也

海鹽縣 上西北至州一百二十七里 本秦縣漢因之其後縣城陷為柘湖移

於武原鄉後又陷為當湖移置山旁隋開皇九年廢縣北屬杭

州武德七年地入嘉興開元五年刺史張廷珪又奏置

常熟縣 緊南至州一百里 本漢吳縣地梁大同六年置常熟縣武德七

年移理海鹽虞城今縣是也

崑山縣 緊西至州八十里 本秦漢婁縣其城吳子壽夢所築梁分置信

義縣又分信義置崑山縣因縣有崑山故取名焉

華亭縣 上西至州二百七十里 天寶十年吳郡太守趙居貞奏割崑山嘉

興海鹽三縣置

華亭谷在縣西三十五里陸遜陸抗宅在其側遜封華亭侯陸

機云華亭鶴唳此地是也

杭州 餘杭開元戶八萬四千二百五十二鄉一百八十八

禹貢揚州之域春秋時為吳越二國之境其地本名錢塘史記

云秦始皇東游至錢塘臨浙江是也漢屬會稽吳志注云西部

都尉理所陳禎明中置錢塘郡隋平陳廢郡為州

州境 東西五百五十四里

八到 西北至上都三千四百里

西南至睦州三百一十五里

東南取浙江至越州一百三十里

西北至宣州四百九十六里

貢賦 開元貢黃藤紙 橋 黃連 緋綾 紋紗 賦綺布

管縣八 錢塘 餘杭 臨安 富陽 於潛 鹽官

新城 唐山

錢塘縣緊郭下本漢舊縣也錢塘記云昔州境逼近海縣理靈隱

山下今餘址猶存郡議曹華信乃立塘以防海水募有能致土

石者即與錢及塘成縣境蒙利乃遷理此地於是改為錢塘按

華信漢時為郡議曹據史記始皇至錢塘臨浙江秦時已有此

名疑所說為謬隋平陳以後縣頻遷置貞觀四年定於今所

靈隱山在州西北十七里

界石山在州西南四十九里

浙江在縣南一十二里莊子云浙河即謂浙江蓋取其曲折為

名江源自歙州界東北流經界石山又東北經州理北又東北

流入於海江濤每日晝夜再上常以月十日二十五日最小月

三日十八日極大小則水漸漲不過數尺大則濤湧高至數丈

每年八月十八日數百里士女共觀舟人漁子泝濤觸浪謂之

弄潮

餘杭縣緊州七十里東南至本吳地吳興記云秦始皇三十七年將上

會稽塗出此地因立為縣舍舟航於此仍以為名

由拳山晉隱士郭文舉所居傍有由拳村出好藤紙

臨安縣緊州一百二十八里東南至州本吳大帝分餘杭縣立臨水縣晉改為

臨安隋亂廢置無準垂拱四年巡撫使狄仁傑復奏置

富陽縣緊州七十三里東北至本漢富春縣屬會稽郡晉孝武帝太元中

避鄭太后諱改春為陽吳孫堅父子即此縣人縣有王洲出橘

為江東之最今見進供

湖泐山在縣西南五十里甚幽邃重疊險遠每時有擾攘人皆

逃避於此山

於潛縣緊州二百里東至本漢舊縣也縣西有晉山因以為名舊晉字

無水至隋加水焉武德七年置潛州領於潛臨水二縣八年廢

州縣屬杭州

天目山在縣理北六十里有兩峯峯頂各一池左右相對名曰

天目

鹽官縣上一百三十里西南至州本漢海鹽縣有鹽官吳志云孫權為將

軍陸遜始仕幕府出為屯田都尉即此地也武德七年省入錢

塘縣貞觀四年復置

海水在縣南七里

臨平湖在縣西五十五里溉田三百餘頃

新城縣上一百三十二里東北至州本漢富春縣地永淳元年分富春西境

置

唐山縣中百四十八里東至州一漢於潛縣地萬歲通天元年置武隆縣

神龍元年改為唐山縣

湖州上吳興開元戶六萬一千一百三十三鄉一百二十一

禹貢揚州之域防風氏之國秦始皇徙越人於此吳歸命侯置

吳興郡梁紹泰初改吳興郡為震州蓋取震澤為名陳初罷震

州復為吳興郡隋平陳廢吳興郡仁壽二年於此置湖州

州境東西三百八里

八到西北至上都三千二百四十里

西北至東都二千二百四十里

東北至蘇州二百一十里

正西微北至宣州三百七十里

東北至常州私路三百里

東至杭州私路一百九十里

貢賦開元貢絲布賦糙秔米紵布

元和貢布三十三端

十三

管縣五 烏程 長城 安吉 武康 德清

烏程縣望郭下本秦舊縣越絕云始皇至會稽徙於越之人於烏

程吳興記云吳景帝封孫皓為烏程侯及皓即位改葬父和於

此遂立為吳興郡

霅溪水一名大溪水一名茗溪水西南自長城安吉兩縣東北

流至州南與餘不溪水苧溪水合又流入於太湖在州北三十

五里

吳興塘太守沈攸之所建灌田二千餘頃

長城縣緊東南至州七十里本漢烏程縣地晉武帝太康三年分其地

置長城縣昔闔閭使弟夫槩居此築城狹而長因以為名

顧山在縣西北四十二里貞元以後每歲以進奉顧山紫笋茶

役工三萬人累月方畢

若溪水釀酒甚濃俗稱若下酒

安吉縣上東北至州一百四十里本漢故鄣縣地漢靈帝中平二年張角

作亂荆揚尤甚唯此郡守險阻固漢朝嘉之故分立為縣

武康縣上東北至州一百五里本漢烏程餘不鄉之地漢末童謠云天子

當興於東南三餘之間故吳大帝改會稽之餘暨為永興而分

餘不鄉置永安縣屬吳興晉平吳改為武康

封山在縣東南十八里即家語云封嵎之山防風氏之國也

德清縣上北至州一百五里天授二年析武康鄉置武原縣景雲二年

改為臨溪縣以臨餘不溪也天寶元年又改為德清縣

睦州新安開元戶五萬五千五百一十六元和戶九千五百四十四

禹貢揚州之域春秋時迭入吳越秦屬丹陽郡為歙縣後漢建

安十三年吳大帝遣中郎將賀齊討歙縣山賊平定分歙為始

新新定黎陽休陽四縣與歙黟凡六縣立新都郡理始新縣晉武帝太康元年改新都為新安郡新定縣為遂安縣隋平陳廢新安郡析新安縣置睦州後又改為遂安郡隋氏喪亂陷於寇賊武德四年討平汪華改為州取俗阜人和內外輯睦為義萬歲通天二年又自新安東移一百六十五里理建德即今州理是

州境東西四百二十里南北三百一十一里

八到西北至上都三千七百一十五里西北至東都二千八百五十五里西北至衢州二百八十一里西北至歙州三百七十里東南至婺州一百六十里

元開元貢 元和貢 交梭二匹 石筴 竹篔 賦 絲 紵 布

貢賦元開元貢 元和貢 交梭二匹 石筴 竹篔 賦 絲 紵 布

管縣六 建德 桐廬 遂安 清溪 分水 壽昌

建德縣郭上 郭下本漢富春縣地吳黃武四年分置建德縣隋大業末改為鎮武德四年復改為建德縣

浙江在州南一十里又有東陽江東南自婺州界來至州南注浙江

七里瀨在縣東北一十里

桐廬縣緊西南至州一百五里本漢富春縣之桐溪鄉黃武四年分置桐廬縣以居桐溪地因名

浙江在縣南一百四十步

桐廬江源出杭州於潛縣界天目山南流至縣東一里入浙江嚴子陵釣臺在縣西三十里浙江北岸也

遂安縣上東北至州一百九十里本漢歙縣地吳大帝使賀齊平黟歙於縣之南鄉安定里置新定縣晉武帝太康元年改為遂安

白石山在縣西七十里其山出白石英貢因以為名

清溪縣上東至州一百六十五里黃武元年分歙縣東鄉置始新縣晉改

為雉山以縣南有雉山因名之隋開皇九年併為新安縣仁壽

中復為雉山開元二年改為還淳今改為清溪

新安江自歙州黟縣界流入縣東流入浙江

分水縣上東北至州一百八十五里本桐廬之西境武德四年置七年省如

意元年改置武盛縣神龍元年復改為分水

壽昌縣中東北至州一百一十里本漢富春縣地吳分立新昌晉太康元

年改為壽昌皇朝因之

元和郡縣圖志卷第二十五終

元和郡縣圖志卷第二十六

江南道二

唐 李吉甫 撰

浙東觀察使

越州會稽都督府開元戶十萬七千六百四十五鄉二百一十五鄉百四十五

今為浙東觀察使理所

管州七 越州 婺州 衢州 處州 溫州 台州

明州

縣三十七 都管戶一十萬四千三百六十七

禹貢揚州之域春秋時為越周禮吳越星紀之分夏少康封少子無餘以奉禹祀號曰於越越國之稱始於茲矣後代句踐稱王與吳王闔閭戰敗之音李故城在今嘉興縣南三十七里

夫差立句踐復伐吳滅之并其地遂渡淮遷都琅邪朝貢周周錫命為伯至六代王無疆為楚所滅秦以其地并吳立為會稽郡後漢順帝時陽羨令周喜上書以吳越二國周旋一萬一千里以浙江山川險絕求得分置遂分浙江以西為吳郡東為會稽郡自晉至陳又於此置東揚州隋平陳改東揚州為吳州大業元年改為越州武德四年討平李子通置越州總管六年陷輔公祏七年平定公祏改總管為都督

州境東西六百四十八里南北三百六十里

八到西北至上都三千五百三十里西北至東都二千六百七十里

東至明州二百七十五里東南至台州四百七十五里

西南至婺州三百九十里西北至杭州一百四十里

貢賦開元貢甘橘甘蔗葛根石蜜交梭白綾自貞元之後凡貢之外別進異文吳綾及花鼓歇單絲吳綾吳朱紗等織麗之物凡數十品

管縣七 會稽 山陰 諸暨 餘姚 蕭山 上虞

剡

會稽縣望郭下山陰越之前故靈文國也秦立以為會稽山陰漢

初為都尉隋平陳改山陰為會稽縣皇朝因之吳越春秋云禹

巡行天下會計修國之道因以會計名山仍為地號山陰縣秦

舊地隋改為會稽垂拱二年又割會稽西界別置山陰大曆二

年刺史薛兼訓奏省山陰并會稽七年刺史劉少遊又奏置今

復併入會稽宋略云會稽山陰編戶三萬號為天下繁劇

重山大夫種葬處

會稽山在州東南二十里

蘭亭山在州西南一十一里

大海在州東四十里

鏡湖後漢永和五年太守馬臻創立在會稽山陰兩縣界築塘蓄水水高丈餘田又高海丈餘若水少則洩湖灌田如水多則閉湖洩田中水入海所以無凶年隄塘周迴三百一十里溉田九千頃

山陰縣望同會稽

諸暨縣望東北至州一百四十五里秦舊縣也界有暨浦諸山因以為名越

王允常所居

烏帶山在縣北五十里出紫石英

餘姚縣緊西至州一百四十里本漢舊縣舜後支庶所封之地舜姚姓故

曰餘姚隋平陳廢武德四年復立仍置姚州七年廢州

四明山在縣西一百五十里

大海在縣北三十里

蕭山縣緊東北至州一百里本曰餘暨吳王弟夫槩邑吳大帝改曰蕭

山以縣西一里蕭山為名

浙江在縣西二十五里

浦陽江在縣南一十五里

上虞縣上西至州九十六里故城西枕上虞江隋平陳廢貞元元年刺

史王密復奏置

上虞江在今縣西二十八里

剡縣望西北至州一百八十五里漢舊縣故城在今縣理西南一十二里吳

賀齊為令移理今所隋末陷於李子通武德中以縣為嵊州六

年廢州縣依舊

天姥山在縣南八十里

剡溪出縣西南北流入上虞縣界為上虞江

婺州 東陽 開元戶九萬九千四百九 鄉一百八十九 元和戶四萬八千三十六 鄉二百

禹貢揚州之域春秋時為越之西界秦屬會稽郡今之州界分得會稽郡之烏傷太末二縣之地本會稽西部常置都尉孫皓

始分會稽置東陽郡陳武帝置縉州隋開皇九年平陳置婺州蓋取其地於天文為婺女之分野隋氏喪亂陷於寇境武德四

年討平李子通置婺州六年輔公祏叛州又陷沒七年平定公祏仍置婺州

州境 東西三百三十三里 南北四百五十六里

八到 西北至上都三千九百九十五里 西北至東都三千三十五里

正北微西至睦州一百六十里 水路一百八十里 正北微東至越州三百九十里 西至衢州一百九十里 東南至處州二百六十里

貢賦 開元貢 藤紙 賦 紵布 元和貢 織纈 白藤 細紙

管縣七 金華 義烏 永康 東陽 蘭溪 武義

浦陽

金華縣 望 郭下 本漢烏傷縣地獻帝初平三年分烏傷置長山縣

屬會稽郡隋平陳改為吳寧縣十二年又改為東陽縣十八年又改為金華縣其長山一名金華故取名焉

東陽江有二源一南自永康縣界流入一東自義烏縣界流入至縣界南合為一謂之東陽江

金華山在縣北二十里赤松子得道處出龍鬚草

義烏縣 緊 西南至州 一百五十一里 本秦烏傷縣也孝子顏烏將葬羣烏銜土塊助之烏口皆傷時以為純孝所感乃於其處立縣曰烏傷

武德四年於縣置縉州縣屬焉又改烏傷為義烏

永康縣望西北至本漢烏傷縣地吳大帝分烏傷之南界置

隋廢武德四年於縣置麗州八年廢州縣屬婺州

東陽縣望西至州本漢烏傷縣地垂拱二年分義烏縣置取

舊東陽郡名也

蘭溪縣緊東南至咸通五年割金華縣西界置

蘭溪在縣南七里東北流入東陽江

武義縣上北至天授二年分永康西界以為武義縣

浦陽縣上西南至天寶十三年分義烏縣北界置

浦陽江在縣西北四十里出雙溪山嶺東入越州諸暨縣

衢州信安開元戶六萬二千二百八十八鄉一百二十四

本舊婺州信安縣也武德四年平李子通於信安縣置衢州以

州有三衢山因取為名六年陷輔公祐廢州垂拱二年復置

州境東西一百一十里

八到西北至上都四千九十五里

南至建州七百里

西至信州二百五十里

東至婺州一百九十里

東南至處州四百五十里

貢賦開元貢紙葛粉紵布龍鬚席

管縣五 信安 常山 龍丘 須江 盈川

信安縣望郭下本春秋姑蔑之地漢太末縣也獻帝初平三年分

太末立新安縣屬會稽郡晉太康元年以弘農有新安故改名

信安皇朝置州縣屬焉

常山縣上東至本太末縣地隋初置定陽縣隋末廢咸亨三

年於今縣東四十里置常山縣因縣南有常山為名廣德二年

本道使薛兼訓奏移置於舊縣西四十里即今縣是也

龍丘縣緊西至州七十二里本春秋姑蔑之地越西部也杜注云今東陽太末縣越絕書謂之姑婺州晉改太末為龍丘因縣東龍丘山為名隋末廢貞觀八年又置

須江縣上北至州九十五里武德四年置衢州分信安縣南境置須江

縣八年並廢永昌元年秋復置以縣南有須江溪因以為名

盈川縣本漢太末縣地如意元年分龍丘縣置元和七年省入信安

穀水江在縣東南一里

處州縉雲開元戶三萬三千二百七十八鄉七十六元和戶一萬九千七百二十六鄉三十六

禹貢揚州之域春秋時為越國秦滅楚置會稽郡後越王無疆

七代孫閩君搖佐漢有功立為東越王都東甌今溫州永嘉縣

是也後以甌地為回浦縣屬會稽後漢改回浦為章安晉立為

永嘉郡梁陳因之隋開皇九年平陳改永嘉為處州十二年又

改為括州大業二年復改為永嘉郡武德四年討平李子通復

立括州仍置總管府七年改為都督府貞觀元年廢天寶元年

為縉雲郡乾元元年復為括州大曆十四年以與德宗諱同音

改處州貞元六年刺史齊抗以舊州湫隘屢有水災北移四里

就高原上

州境東西南北

八到西北至上都四千一百五十五里西北至東都三千二百九十五里西北至婺州二百六十里西北至衢州四百五十里

東北至台州四百九十里

西北至建州水路九百里陸路四百九十里

東南水路至溫州二百七十里

貢賦開元貢元和貢葛縉布蜜縣樹皮布小綾紗絹

管縣六 麗水 松陽 縉雲 遂昌 青田 龍泉

麗水縣上 郭下 本後漢松陽縣地隋平陳乃分松陽縣之東鄉立括蒼縣取括蒼山為名屬處州後因之不改大曆十四年改為麗水麗水本名惡溪以其湍流阻險九十里間五十六瀨名為大惡隋開皇中改為麗水皇朝因之以為縣名

松陽縣上 東至州二百里 本漢回浦縣之地屬會稽後漢分立此縣有大松樹大十八圍因取為名隋開皇九年廢十二年復置皇朝因之

縉雲縣上 西南至州八十五里 萬歲登封元年分麗水縣東北界婺州永康縣南界置因山為名

縉雲山一名仙都一曰縉雲黃帝鍊丹於此 遂昌縣上 東至州三百四十里 吳赤烏二年分太末縣置平昌縣晉太康元年改為遂昌武德八年廢景雲二年刺史孔琮復奏置

青田縣中 東至州一百五十里 本麗水縣之鄉名也景雲二年刺史孔琮奏於此分置青田縣

青田溪在縣西南十八里

龍泉縣中 東至州三百五十里 乾元二年越州刺史獨孤峻奏割遂昌松陽二縣置

龍泉洞在縣南二里

溫州上 永嘉 開元戶三萬七千五百五十四 鄉七十八 元和戶八千四百八十四 鄉一十六

本漢會稽東部之地初閩君搖有功於漢封為東甌王晉大寧中於此置永嘉郡隋廢郡地入處州武德五年杜伏威歸化於縣理置東嘉州尋廢六年輔公祐為亂於丹陽永嘉安固等百姓於華蓋山固守不陷凶黨高宗上元元年於永嘉縣置溫州

州境東西二百四里
南北七百二十里

八到西北至上都四千四百二十五里
西北至東都三千五百六十五里
正北至西至台州五百里
西北至處州二百七十里

貢賦開元貢 元和貢 鮫魚皮
西南至福州水陸路相兼一千八百里
鮫魚皮三十張

管縣四 永嘉 安固 橫陽 樂成

永嘉縣上 郭下 卽漢回浦縣之東甌鄉晉立為縣上元二年於此

置溫州縣移在州東一百八十步

永嘉江一名永寧江在州東三里

華蓋山在州東一里

安固縣上 北至州 本漢回浦縣地後漢改回浦為章安吳分

章安於此立羅陽縣少帝改曰安陽晉太康元年更名安固前

上元二年自處州割入溫州

安固山在縣北一里

安固江在縣南一里

橫陽縣上 北至州 本晉太康元年分安固南橫嶼屯置隋平

陳廢入安固縣大足元年又分安固縣再置

橫陽山在縣南二百七十里東臨大海

橫陽江在縣南一百里

樂成縣上 北至州 本漢回浦縣地東晉孝武帝分永寧縣

置隋廢載初元年復置

大海在縣東一十一里

台州臨海 開元戶五萬
元和戶 鄉一百一十五 鄉九十五

禹貢揚州之域春秋時為越地秦并天下置閩中郡漢立東部

都尉本秦之回浦鄉分立為縣揚雄解嘲云東南一尉西北一
候是也後漢改回浦為章安縣吳大帝時分章安永寧置臨海
郡隋平陳廢郡為臨海縣武德四年討平李子通於臨海縣置
海州五年改海州為台州蓋因天台山為名六年輔公祏叛州
從陷沒七年平定公祏仍置台州

州境東西三百九十三里
南北四百三十五里

八到西北至上都四千五百里
正南微東至溫州五百里
東至大海一百八十里
西北至越州四百七十五里
正西微南至處州四百九十里

貢賦開元貢 乾薑三百斤 鮫魚皮
元和貢 甲香三十斤 鮫魚皮一百張

管縣五 臨海 唐興 黃巖 樂安 寧海

臨海縣緊郭下本漢回浦縣地後漢更名章安吳分章安置臨海

縣屬會稽郡武德五年改置台州縣屬焉

臨海江有二水合成一水一自始豐溪一自樂安溪至州城西
北一十三里合

唐興縣上東南至州一百一十里三國時吳分章安置南始平縣晉武帝
以雍州有始平改為始豐肅宗上元二年改為唐興

天台山在縣北一十里

赤城山在縣北六里實為東南之名山

黃巖縣上北至州一百五里前上元二年割臨海南界置

黃巖山在縣西南二百三十里

大海在縣東七十里

樂安縣上東至州一百五里東晉穆帝永和三年分始豐南鄉置樂安
縣屬臨海郡歷代因之隋開皇九年廢武德五年改屬前上元

元年復置於孟溪之側今縣是也

樂安溪源在縣西馮溪山流經縣南又東入臨海縣界

寧海縣上西南至州二百五十里晉穆帝永和三年分會稽之鄞縣置寧

海縣隋開皇九年廢併入章安縣永昌元年於廢縣東二十里

又置載初元年移就縣東一十里

大海在縣東六里

明州餘姚開元戶元和戶四千八十三

本會稽之鄞縣及句章縣地也春秋越王句踐平吳徙夫差於

甬東韋昭云卽句章東澹口外洲是也武德四年於縣立鄞州

八年廢開元二十六年採訪使齊澣奏分越州之鄞縣置明州

以境內四明山爲名句章故城在州西一里

州境東西

八到西北至上都三千八百五里

西北至東都二千九百四十五里

東北至大海七十里

西至越州二百七十五里

西南至台州寧海縣一百六十里至州二百五十里

貢賦開元貢海肘子 橘子 紅蝦米 鱸子 紅蝦鮓

管縣四 鄞 奉化 慈溪 象山

鄞縣上本漢舊縣也屬會稽郡隋平陳省入句章武德八年

再置仍移理句章城後屬明州

大海在縣東七十里

翁洲入海二百里卽春秋所謂甬東地也越滅吳請吳王居甬

東吳王曰孤老矣不能事君王乃縊其洲周環五百里有良田

湖水多麋鹿

奉化縣上北至州六十里本漢之鄞地開元二十六年採訪使齊澣奏置

赤崑山在今縣東一十里

慈溪縣上東南至州七十里本漢鄞縣地開元二十六年齊澣奏置

慈溪在縣南二十二里

大海在縣北六十里

象山縣中西北至州水陸相兼一百六十里本漢鄞縣地神龍元年監察御史

崔皎奏於寧海縣東界海曲中象山東麓彭姥村置縣東至大海二十里南至大海三十五里東北至大海四十里正北至大海一十五里唯西南有陸路接台州寧海

元和郡縣圖志卷第二十六終

元和郡縣圖志卷第二十七

唐 李吉甫 撰

江南道三

鄂岳觀察使

鄂州江夏開元戶一萬九千一百九十九鄉三十三

今為鄂岳觀察使理所

管縣六 鄂州 沔州 安州 黃州 蘄州 岳州

縣二十五 都管戶七萬二千二百四十七

禹貢荊州之域春秋時謂之夏汭漢為沙羨之東境自後漢末謂之夏口亦名魯口吳置督將於此名為魯口屯以其對魯山岸為名也三國爭衡為吳之要害吳常以重兵鎮之魏明帝問司馬懿曰二虜宜討何者為先對曰吳以中國不習水戰故敢

散居東關凡攻敵必扼其喉而春其心夏口東關敵之心喉若以陸軍向皖引權東下為水軍向夏口乘其虛而擊之此神兵從天而墜矣晉庾翼為荊州曾理於此義熙初劉毅表以為夏口二州之中地居形要控接湘川邊帶漢沔請荊州刺史劉道規鎮夏口至六年自臨嶂徙理夏口即今州理是也宋孝武帝以方鎮太重分荊湘江三州之八郡為郢州以分上流之勢隋平陳改郢州為鄂州州城本夏口城吳黃武二年城江夏以安屯戍地也城西臨大江西南角因磯為樓名黃鶴樓三國時黃祖為太守吳遣凌統攻而擒之禰衡遇害亦此地也東南角樓名焦度樓宋沈攸之自荊州稱兵至此時焦度領兵在此城守東南角攸之攻之不克遂退走因名焦度樓

州境東西四百七十四里
南北三百八十八里

八到西北至上都二千二百六十里
東北至東都一千四百里

東至江州六百里

西南至岳州五百五十里

西北至安州二百九十里

西至沔州隔江七里

正北微東至黃州二百里

貢賦開元貢 銀 礫 賦 紵布
元和貢 銀十五兩

管縣五 江夏 永興 武昌 唐年 蒲圻

江夏縣望 郭下本漢沙羨縣地屬江夏郡東晉以汝南流人僑立

汝南郡後改為汝南縣隋開皇九年改為江夏縣屬鄂州

黃鶴山在縣東九里

江水西南自蒲圻縣界流入又北對崢嶸州劉毅破桓玄於此

又北流經黃軍浦相傳吳將黃蓋屯軍處

曹公城在縣東北二里梁武帝起義遣將曹景宗所築

頭陀寺在縣東南二里

鸚鵡洲在縣西南二里

永興縣緊西北至州四百里本漢鄂縣地吳大帝分立新陽縣隋開皇

九年改爲富川十八年改爲永興縣

石鼓山在縣西六十里上有三石鼓鼓鳴天卽雨

大江水在縣西北四十五里

下雉故縣在縣東南一百四十里漢伍被謂淮南王安曰守下雉之城絕豫章之口是也

陳永興故城在縣東五十里東臨江水俗云伍子胥所築

武昌縣緊西至州一百七十里舊名鄂本楚熊渠封中子紅於此稱王至

今武昌人事鄂王神是也離騷云乘鄂渚而反顧漢以爲縣屬江夏郡武帝以封姊號鄂邑長公主建安二十五年吳大帝以

下雉尋陽新城柴桑沙羨武昌六縣爲武昌郡黃武初自建業

徙都廢黃龍九年於此卽尊位還都建業皇太子登留守武昌

以陸遜輔之嘉禾元年太子還建業立皇子奮爲齊王居武昌

諸葛恪不欲諸王處瀕江兵馬之地徙居豫章甘露元年歸命

侯又都之揚土百姓沂流供給以爲患苦陸凱上疏曰武昌土

地實危險而堵确非王都安國養人之處且童謠言寧飲建業

水不食武昌魚寧還建業死不止武昌居於是還都建業改爲

江夏縣後爲武昌

樊山在縣西三里謝元暉詩曰釣臺臨講閣樊山開廣宴謂此也

西塞山在縣東八十五里竦峭臨江

孫權故都城在縣東一里餘本漢將灌嬰所築晉陶侃桓溫爲

刺史並理其地

唐年縣上西北至州六百三十里本漢沙羨縣地天寶二年分置唐年縣

葛仙山在縣北六十里

壺頭山在縣東北六十里

下雋故城在縣西南一百六里因雋水為名

蒲圻縣上東北至州四百一十里本漢沙羨縣地晉武帝改為沙陽今縣

口一里沙陽故縣城是也吳大帝分立蒲圻縣因蒲圻湖為名

本屬長沙郡隋割屬鄂州

赤壁山在縣西一百二十里北臨大江其北岸即烏林與赤壁

相對即周瑜用黃蓋策焚曹公舟船敗走處故諸葛亮論曹公

危於烏林是也

雋水源出縣東南

大嶧水西北流入江

蒲圻湖在縣南七十五里

呂蒙城在縣西南八十里孫權以蒙為橫野將軍為周瑜破曹

公定荊州於此鎮守

沔州漢陽開元戶五千二百八十六鄉十二元初戶二千二百六十二鄉十二

本漢安陸縣地晉於今州西臨嶂山下置沌陽縣江夏郡自上

昶城移理焉後郡又移理夏口沌陽縣屬郡下不改入陳廢隋

開皇九年置戍十七年廢戍改置漢津縣屬沔陽郡大業二年

改為漢陽縣武德四年分沔陽郡於漢陽縣置沔州及縣並自

臨嶂山下改移於今理

州境東西二百五十二里南北二百四十六里

八到西北至上都二千二百五十里東北至東都一千三百九十三里

東渡江至鄂州七里

西北至隨州四百三十五里

東北至黃州二百二十里

西至復州竟陵縣三百四十里

西北至安州二百八十里

西取桐塚路至復州四百六十里

貢賦

開元貢 白紵布一端
元和貢 麻貴布一端

管縣二 漢陽 漢川

漢陽縣中郭下 縣本末已具州序

魯山一名大別山在縣東北一百步其山前枕蜀江北帶漢水

山上有吳將魯肅神祠

臨嶂山在縣西六十里

大江水南自復州沔陽縣界流入去縣東二十步東北流入黃

州界

漢水一名沔水西自漢川縣界流入漢陽縣因此水為名

御月故城在縣北三里劉表將黃祖所守處

漢川縣中東至州一百五十里 本漢陽縣地武德四年分置漢川縣因漢

水為名也

內方山在縣南九十里

小別山在縣東南五十里春秋吳伐楚令尹子常濟漢而陳自

小別至於大別即此也

漢川水在縣南二里西北自鄂州界流入

赤壁草市在縣西八十里古今地書多言此是曹公敗處今按

三國志劉表卒其子琮代立在襄陽劉備屯樊琮降曹公備隨

南走曹公以江陵有軍實恐備先據得之自當陽倍道追備一

日夜行三百里遂克江陵又自江陵追備至巴丘遂至赤壁孫

權遣周瑜程普各領兵萬人與劉備來敵曹公遇於赤壁因風

縱火曹公大敗遂取華容道步歸退保南郡瑜等復追之曹公留曹仁守江陵自徐北歸據此而言則赤壁不在漢川也何則曹公既從江陵水軍至巴丘赤壁又在巴丘之下軍敗引還南郡周瑜水軍退並是大江之中與漢川殊為乖繆蓋是側近居人見崖岸赤色因呼為赤壁非曹公敗處也

安州

安陸中府

開元戶二萬二千二百二十二

鄉三十五

春秋時鄖國後為楚所滅漢為安陸縣高帝六年分南郡置江夏郡於此領縣二十四後漢移理沙羨曹魏齊王芳時王基為荊州自城上昶徙江夏郡理之以逼夏口在今州西北五十三里上昶故城是也江夏郡自後漢末當吳魏二國之境永嘉南遷後又當苻秦石趙與東晉犬牙為界自後魏周隋與宋齊梁陳交爭之地故江夏前史所載或移於沙羨或移於上昶或移理魯山城南北二朝兩置江夏郡吳理武昌曹魏與晉俱理安陸故漢所理江夏郡前書多言在安陸其雲夢縣東南四里滙水之北有江夏古城周所理據山川言之此城南近夏水餘阨寬大則前漢江夏郡所理也宋武帝分江夏置安陸郡後魏大統十六年改為安州

州境

東西二百一十九里南北三百二十五里

八到

西北至上都一千九百七十里東北至東都一千一百六十里東至黃州三百一十里東南至鄂州二百九十里西南至復州三百二十里西北至隨州一百五十五里東南至沔州二百八十里

貢賦

開元貢元和貢

紵布一十八匹紵布一十四匹

賦 縣 紵

管縣六 安陸 應山 雲夢 孝昌 吉陽 應城

安陸縣

上

郭下

本漢舊縣屬江夏郡隋改屬安州其城三重西枕

涓水

陪尾山一名橫山在縣北六十里禹貢云熊耳外方桐柏至于陪尾卽此也

涓水故清發水也西北自隨州流入注於沔謂之鄖口春秋吳敗楚於柏舉從之及於清發是也

雲夢澤在縣南五十里史記司馬相如傳云楚有七澤其小者名雲夢方九百里左傳云邳子之女棄子於夢中无雲字楚子濟江入雲中復無夢字以此推之則雲夢二澤本自別矣而禹貢及爾雅皆曰雲夢者蓋雙舉二澤而言之故後代以來通名一事左傳曰畋於江南之雲夢是也

應山縣

中

南至州一百八里

本漢隨縣地梁大同以隨州北界應濃山

成置應州又分隨縣置永陽縣隋開皇十八年改永陽爲應山縣

石龍山在縣東北二十五里有石盤回屈曲若龍形

禮山關因古禮山縣爲名武德八年縣廢卽齊志所謂武陽關也在州東北二百四十里在縣東北一百三十里北至申州一百五十里

百雁關按圖經云昔有雁息其上故以爲名在州東北二百里在縣北九十里北至申州九十里東至禮山關一百里

平靖關因古平靖縣爲名後魏大統十七年置隋大業二年廢齊志云義陽有三關此則其一在州北一百七十里在縣北六十五里北至申州九十里東至百雁關一百六十里

雲夢縣

中

北至州七十里

本漢安陸縣地後魏大統末於雲夢古城置

雲夢縣

雲夢澤在縣西七里

孝昌縣

中 西北至 州八十里

本漢安陸縣地宋於此置孝昌縣屬江夏

郡即隋改安州也

吉陽縣

中 西至州 一百三十里

本漢安陸縣地梁於此置平陽縣其故城

今理是也西魏改為京池縣隋大業二年改為吉陽因縣北吉

陽山為名

應城縣

中 東北至 州八十里

本漢安陸縣地宋於此置應城縣

故浮城縣在縣西北三十五里即古蒲騷城也左傳莫敖狃於

蒲騷之役郢人軍於蒲騷是也後魏於此置浮城縣隋廢

孔山故城在縣東北一百一十里

平靖故城在縣西四十里

吉陽故城在縣北五十里

黃州

齊安 開元戶一萬三千七十三 元和戶五千五百四十四

鄉二十八 鄉一十八

本春秋時邾國之地後又為黃國之境戰國時屬楚秦屬南郡

二漢為江夏郡西陵縣地魏為重鎮文帝黃初中吳先揚言欲

畋於江北豫州刺史滿寵度其必襲西陽遂先為之備權聞之

尋亦退還後吳克邾城使陸遜以三萬人城而守之至晉為西

陽國封子弟為王蕭齊於此置齊安郡隋開皇三年罷郡置黃

州因古黃國為名也

州境

東西二百一十里 南北三百三十七里

八到

西北至上都二千二百八十里 東北至東都一千四百七十里 東南至蘄州二百三十里 西南至鄂州二百三十里 南至大江一百步 西至安州三百一十里

北至光州三百六十里

貢賦 開元貢 紵貨布十四匹 賦 絹 布 絲 麻

管縣三 黃岡 黃陂 麻城

黃岡縣 上郭下 本漢西陵縣地故城在今縣西二里蕭齊於此置

齊安縣隋開皇十八年改為黃岡因縣東黃岡為名

大江水西自黃陂縣界流入經州南一百一十八里東入蘄州

界

故邾城在縣東南一百二十里古邾國也後為楚所滅漢以為

縣

西陽故城在縣東南一百三十里漢縣也屬江夏郡

大活故城在縣北二百三十五里隋於此置關鎮

黃陂縣 中東北至州一百二十里 本漢西陵縣地三國時劉表為荊州刺

史以此地當江漢之口懼吳侵軼建安中使黃祖於此築城鎮

邊因名黃城鎮周大象元年改鎮為南司州并置黃陂縣隋初

改為鎮後復為縣

白沙關西至大關六十里在州西二百四十里北至光州界二

十五里

大活關東北至光州二百八里西至安州禮山關一百里在縣

北二百里

大江水在縣南一百二十九里西南自江夏縣界流入又東入

黃岡縣界

武湖在縣南四十九里黃祖閱武習戰之所後宋謝晦舉兵叛

為檀道濟所破敗走武湖戍生執之即此地也

龍驤水在縣南七十二里相傳晉龍驤將軍王濬率舟師伐吳

屯軍於此

石陽故城在縣西二十三里吳聞魏文帝崩征江夏圍石陽不克而還卽此也

安昌故城在縣西南七十里高齊築以捍陳寇

麻城縣中南至州一百一十里本漢西陵縣地梁於此置信安縣隋開皇

十八年改爲麻城縣

龜頭山在縣東南八十里舉水之所出也春秋吳楚戰於柏舉卽此地也

陰山關西至穆陵關一百里在縣東北一百里在州東北二百里北至光州殷城縣二百里

穆陵關西至白沙關八十里在縣西北一百里在州北二百里至光州一百四十九里

蕲州蕲春開元戶二萬六千八百九十二鄉五十一元和戶一萬六千四百六十二

禹貢揚州之域春秋戰國並屬九江郡在漢爲蕲春縣地屬江夏郡三國時屬魏魏使廬江謝奇爲蕲春典農屯皖呂蒙襲擊破之後於此復置蕲春郡晉孝武帝改曰蕲陽以鄭太后諱故也高齊於此立齊昌郡後陷於陳改爲江州周平淮南改爲蕲州

州境東西三百三十九里南北五百五十五里

八到西北至上都二千五百一十里西北至東都一千七百里

東北至舒州三百七十里東北至壽州踰大山九百七十里東北至江州二百五十里西北至黃州二百三十里

貢賦開元貢白紵細布元和貢白紵布一十五匹

管縣四 蕲春 黃梅 蕲水 廣濟

蕪春縣上郭下本漢舊縣屬江夏郡因蕪水以為名也晉改為蕪陽隋開皇十八年復改蕪春縣

蕪水西南經縣三里源出東北大浮山一名蕪山

翻車故城在縣東南八十二里九江王黥布背項籍歸漢因築此城城近翻車水因以為名

黃梅縣上西至州一百四十里本漢蕪春縣地隋開皇九年置新蔡縣屬蕪州仁壽元年改為黃梅縣因縣北黃梅山為名縣城晉驃騎將軍郭默所築

大江水在縣南一百里

太子汛在江之岸梁武帝初下建業留丁貴嬪於此生太子因以為名

九江故城在縣西南七十里漢九江王黥布所築

蕪水縣上東南至州七十二里本漢蕪春縣地宋文帝於此置浠水縣北齊改為蘭溪鎮武德四年改為縣天寶六年以名重改為蕪水縣也

廣濟縣中西至州五十里本漢蕪春縣地武德四年以此地衝要置永

寧縣天寶元年以名重改為廣濟縣

江水在縣南一百二十里

積布山在縣南一百里南臨大江壘石壁立形如積布故以為名俗謂之積布磯

岳州巴陵下開元戶九千一百六十五元和平戶一千五百三十五鄉二十一

本巴丘地古三苗國也史記三苗之國左洞庭右彭蠡春秋及戰國時屬楚秦屬長沙郡吳於此置巴陵縣宋文帝又立為巴陵郡梁元帝改為巴州隋開皇九年改為岳州大業三年為羅

州武德六年復爲岳州

州境東西三百九十一里
南北四百一十里

八到西北至上都二千二百二十五里
西北至東都一千八百六十五里
西北至江陵府五百七十里
南至潭州五百五十里
西至澧州四百四十里
東北至鄂州五百五十里
北至復州沔陽縣五百五十里

貢賦開元貢 細紵布 賦 麻 紵 縑
元和貢 白紵練布七匹

管縣五 巴陵 華容 湘陰 沅江 昌江

巴陵縣上郭下本漢下雋縣之巴丘地也下雋屬長沙郡故城在

今蒲圻縣界吳初巴丘置大屯戍使魯肅守之後改爲巴陵縣
自晉以後遂因之蜀志曰西增白帝之兵東益巴丘之戍又周
瑜卒於巴丘皆此地也昔羿屠巴蛇於洞庭其骨若陵故曰巴

陵

君山在縣西三十里青草湖中昔秦始皇欲入湖觀衡山遇風
浪至此山止泊因號焉又云湘君所游止故名之也

大江在縣北五里

巴陵城對三江口岷江爲西江澧江爲中江湘江爲南江

彭城洲在縣東北九十四里宋元嘉三年荊州刺史謝晦反臺
遣到彥之進討軍次彭城洲彥之軍敗退保隱磯卽此處也

侯景浦在縣東北十二里本名三湘浦景旣克建業自統兵西
趣荆峽先遣其將宋子仙任約襲郢州湘東王繹令王僧辯拒
之景軍大敗燒營退走天監中寶誌道人爲符書云起自汝蔡
訖於三湘侯景果起於懸瓠汝水之南而敗於巴陵三湘之浦
也

洞庭湖在縣西南一里五十步周迴二百六十里湖口有一洲名曹公洲

巴丘湖又名青草湖在縣南七十九里周迴二百六十五里俗云古雲夢澤也曹公征荊州還於巴丘遇疾燒船歎曰郭奉孝在不使孤至此

澧湖一名翁湖在縣南一十里爾雅云河水決出還復入者爲澧左傳定公四年吳人敗楚於雍澨五戰入郢卽此是也

陶侃故城在縣東北八里

華容縣中東至州一百六十里本漢孱陵縣地吳分置南安縣隋平陳以縣屬岳州開皇十八年改爲華容縣

方臺山在縣南三十二里出雲母往往有長四尺者可以爲屏風掘時忌有聲響則所得龜惡

赤亭湖在縣南八十里侯景攻巴陵遣將任約等入湖湘東王使胡僧祐陸法和夜以大艦遏湖口因風縱火鼓譟而前賊窮聚湖中俄然崩潰卽此也

赤亭故城在縣西南七十里城據絕景原三面臨水極爲阻隘梁湘東王遣胡僧祐據城以擒任約

湘陰縣中下北至州三百三十里本春秋時羅子國秦爲羅縣今縣東北六十里故羅城是也宋元徽二年分益陽羅湘西三縣立湘陰縣

玉笥山在縣東北七十五里屈原放逐居此山下而作九歌焉湘水南自長沙縣界流入又北入青草湖昔王延壽有異才年二十而得惡夢作夢賦年二十一溺死於湘浦卽斯川也湘水至清雖深五六丈了了見底

汨水東北自洪州建昌縣界流入西經玉笥山又西經羅國故城爲屈潭卽屈原懷沙自沈之所又西流入於湘水

舜二妃冢在縣北一百六十三里青草湖上

屈原冢在縣北七十一里

沅江縣中下東北至本漢益陽縣地梁元帝分置重華縣隋

平陳改爲安樂縣開皇末又改爲沅江縣

關州在縣東南五十八里建安二十年孫權以先主得蜀使使求還荊州先主言須得涼州乃相與權患之遣呂蒙襲長沙零陵桂陽三郡先主引兵五萬下公安令關羽入益陽此州蓋羽屯兵之處故以爲名

沅江水西北自龍陽縣界流入與華容縣中分爲界

昌江縣中下西北至後漢分長沙爲漢昌縣孫權改爲吳昌

縣神龍三年析湘陰於故吳昌城改置昌江縣

汨水在縣東北四十里

元和郡縣圖志卷第二十七終

元和郡縣圖志卷第二十八

唐 李吉甫 撰

江南道四

江西觀察使 洪州 饒州 虔州 吉州 江州 袁州

信州 撫州

宣歙觀察使 宣州 歙州 池州

洪州 豫章 開元戶五萬五千四百五 鄉九十四

中都督府 元和戶九萬一千一百二十九 鄉一百二十

今為江南西道觀察使理所 管州八 洪州 饒州 虔州 吉州 江州 袁州

信州 撫州

管縣三十八 都管戶二十九萬三千一百八十

禹貢揚州之域 春秋時楚之東境吳之西境七國時全為楚地

秦滅楚為九江郡晉惠帝元康二年於郡理立江州東晉元帝時江州自豫章移理武昌郡自後或理湓城或理潯陽或理半洲並在湓城側近隋開皇九年平陳置洪州因洪崖井為名武德元年改為總管府七年改為都督府

州境

東西一千六百一十五里
南北一千一百五十六里

八到

西北至上都三千八十五里
西北至東都二千二百七十五里
東至饒州四百四十里
西至潭州一千一百三十五里
南至撫州二百一十九里
北至江州三百二十五里

貢賦

開元貢葛 紵布 丹參 旋覆花
元和貢細葛布一十五匹

管縣七

南昌 高安 新吳 豐城 建昌 武寧

分寧

南昌縣 郭下 漢高帝六年置隋平陳改為豫章縣寶應元年六月改為鍾陵縣十二月改為南昌縣

高安縣

緊 東至州一百五十里 本漢建城縣武德五年改為高安仍於縣

置靖州八年廢州復為縣屬洪州

新吳縣

上 東至州一百五十里 後漢靈帝中平中分海昏縣置隋開皇九年省入建昌武德五年又置舊隸楚今新屬吳故曰新吳

豐城縣

上 北至州一百四十七里 本漢南昌縣地晉武帝太康元年移於

今縣南四十一里名豐城即是雷孔章得寶劍處也

建昌縣

緊 北至州一百二十二里 東三里故海昏城即漢昌邑王賀所封

今縣城則吳太史慈所築

武寧縣

上 東至州三百六十里 長安四年割建昌界置

分寧縣

上 東南至州六百五十里 貞元十六年刺史李巽奏分武寧縣西

界置因以名焉

饒州 鄱陽 開元戶一萬四千六十二 鄉二十九
元和戶四萬六千一百一十六 鄉六十九

本秦鄱陽縣也屬九江郡鄱陽記云在揚州巳午之間孫權分
豫章立為鄱陽郡梁承聖二年改為吳州至陳光大元年省吳
州依舊置郡隋開皇九年平陳改鄱陽為饒州其城即吳芮為
番令所居城

州境 東西六百五十九里
南北四百六十一里
八到 西北至上都三千一百三十里
西南至東都二千三百二十里
東南至信州五百里
東北至池州五百八十里
東北至歙州七百里
西至洪州四百四十里
西至撫州四百七十里

貢賦 開元貢 楚金 紵布 杭米
元和貢 楚金 竹簞

管縣四 鄱陽 餘干 樂平 浮梁

鄱陽縣 郭上 秦置孫權分豫章置鄱陽郡理於此晉武帝改為
廣晉隋開皇九年改廣晉為鄱陽以在鄱水之北故曰鄱陽
永平監置在郭下每歲鑄錢七千貫

餘干縣 州上 東至漢餘汗縣淮南王云田於餘汗是也縣因餘
汗之水為名隋開皇九年去水存干名曰餘干

樂平縣 州上 西至州本漢餘汗縣地後漢靈帝於此置樂平縣
南臨樂安江北接平林因曰樂平

銀山在縣東一百四十里每歲出銀十餘萬兩收稅山銀七千
兩

浮梁縣 州上 西南至州武德五年析鄱陽東界置新平縣尋廢
開元四年刺史韋玢再置改名新昌天寶元年改名浮梁每歲
出茶七百萬馱稅十五餘萬貫

虔州

南康 開元戶三萬二千八百三十七

鄉五十七

孫權嘉禾五年分廬陵立南部都尉理雩都晉武帝太康三年

罷都尉立為南康郡至永和五年移理贛隋開皇九年平陳罷

南康郡為虔州大業三年罷虔州復為南康郡武德五年又再

置虔州蓋取虔化水為名也

州境

東西一千四百二里 南北一千三百三十九里

八到

西北至上都四千一百二十五里 東北至東都三千三百一十五里 東至建州一千五百八十五里 西至郴州一千一百一十二里 南至循州一千六百一十四里 北至吉州四百七十四里

貢賦

開元貢 白紵布 乾薑 元和貢 白紵布 蜜梅

管縣七

贛

南康

信豐

大庾

雩都

虔化

安遠

贛縣

郭下 貢水西南自南康縣來章水東南自雩都縣來二水

至州北合而為一通謂之贛水因為縣名

南康縣

州上 東北至 州八十里

本漢灌嬰所置南壄縣也屬豫章郡獻帝

初平二年析南壄置南安縣晉太康五年改為南康

信豐縣

州上 北至州一 百九十五里

獻帝初平二年分南壄立南安縣晉武

帝改為南康永淳元年析南康更置南安天寶元年改為信豐

大庾縣

州上 東北至州 二百二十里

南康記云前漢南越不賓遣監軍庾姓

者討之築城於此因之為名隋以為鎮神龍初改鎮為縣

雩都縣

州上 西北至州 一百七十里

漢初所置因雩都水為名

虔化縣

州上 西南至州 四百七十六里

本漢贛縣地吳寶鼎三年初置新都晉

太康元年改為寧都隋開皇十八年改寧都為虔化

安遠縣

州上 西北至州 五百二十里

梁大同中於今縣南七十里安遠水南

置安遠縣隋開皇中廢貞元四年刺史路應重奏分零都縣地置

吉州廬陵開元戶三萬四千四百八十一鄉七十四

本秦廬陵屬九江郡獻帝興平二年分豫章於此置廬陵郡晉

太康中移郡於石陽縣今舊州東北故城是也隋開皇中改廬

陵為吉州有吉水因為名焉

州境東西四百二十里

八到西北至上都三千六百五里

北至東都二千七百九十里

東北至撫州四百五十里

西至衡州九百一十里

南至虔州五百二十里

北至洪州五百七十六里

貢賦開元貢 白紵布 茶 陟釐

管縣五 廬陵 安福 永新 太和 新淦

廬陵縣郭上本漢石陽縣晉移郡於此隋改為州又改名石陽

縣為廬陵因廬水為名

安福縣上東至州一百二十里本漢安平縣後漢改為平都縣屬廬陵吳

分置安城郡隋廢郡為安復縣武德中改為安福縣

永新縣上東北至州二百一十一里本漢廬陵縣地吳歸命侯所置屬安城

郡隋開皇中廢顯慶四年又依舊置

太和縣上北至州一百里隋開皇九年平陳分廬陵縣置西昌縣十八

年改為太和

新淦縣上南至州二百七十里本漢舊縣豫章南部都尉所居縣有淦水

因以為名陳割屬巴山郡隋開皇中廢郡縣屬吉州

江州潯陽開元戶二萬一千八百六十五鄉四十一

元和戶一萬七千九百四十五 鄉四十九

禹貢揚荊二州之境揚州云彭蠡既豬今州南五十二里彭蠡

湖是也荆州云九江孔殷今州西北二十五里九江是也然彭蠡以東為揚州界九江以西屬荆州界春秋時為吳之西境吳為越滅後復為楚地秦屬廬江郡漢屬淮南國晉太康十年以荆揚二州疆域曠遠難為統理分豫章鄱陽廬江等郡之地置江州因江水以為名理豫章至惠帝分廬江之潯陽武昌之柴桑置潯陽郡自東晉元帝至蕭齊或理半洲至陳武帝於潯陽置西江州復理豫章文帝天嘉元年省西江州江州自豫章復理潯陽隋文帝平陳置江州總管移理淦城大業三年罷江州為九江郡武德四年討平林士弘復置江州五年又置總管七年改為都督貞觀二年罷都督府州理城古之淦口城也漢高帝六年灌嬰所築漢建安中孫權經此城權自標地令人掘之正得古井銘云漢六年頽陰侯開三百年當塞後不滿百年當

為應運者所開權以為己瑞井極深大江中風浪井水輒動晉咸和四年後將軍郭默殺平南將軍劉楨叛於此城陶侃討默築壘以攻之默乃以布囊盛米為壘以應陶今稱云陶公壘

州境 東西五百九十九里 南北一百七十七里 八到 西北至上都二千七百六十里 西北至東都一千九百五十里 東至宣州一千八百里 西至鄂州五百九十三里 南至洪州三百二十五里 西北至蘄州二百八十九里

貢賦 開元貢葛 元和貢石斛 元和中貢礫

管縣三 潯陽 彭澤 都昌

潯陽縣 郭下 本漢舊縣屬廬江郡以在潯水之陽故曰潯陽隋平陳改潯陽為彭蠡縣大業二年改為淦城縣武德五年復改為潯陽縣

廬山在縣東三十二里本名鄣山昔匡俗字子孝隱淪潛景廬於此山漢武帝拜為大明公俗號廬君故山取號周環五百餘里

巢湖故城在縣東四十二里按楚有二巢一在廬江六縣其南巢桀所奔處蓋此

柴桑故城在縣西南二十里

半洲故城在縣西九十里按吳將孫慮黃武六年出鎮於此築此城

官亭湖神廟在縣東南九十里

彭澤縣上西南至州二百里本漢舊縣屬豫章郡置彭城湖南因以為

名隋開皇九年廢彭澤別置龍城縣至十八年又改為彭澤縣馬當山在縣東北一百里橫入大江甚為險絕往來多覆溺之

懼

江水西自都昌縣界流入經縣北二十五里東北流入秋浦縣界

都昌縣上西北至州一百五十里本漢彭澤縣地武德五年分置都昌縣

以縣北有都村配以昌字取嘉名也

彭蠡湖在縣西六十里與潯陽縣分湖為界

釣磯山在縣南一百一十二里昔陶侃嘗釣於此得一梭化為龍而去

彭澤故城在縣北四十五里晉陶潛為令理此城

左里故城在縣西南九十五里盧循為宋祖所敗自蔡州南走還屯潯陽聞大軍將至欲走豫章乃悉力柵斷左里及大軍至將戰高祖所執麾竿折幡沈水眾懼公笑曰往年覆舟之戰幡

竿亦有折者今復然賊必破矣即進攻柵賊投水死者萬餘人遂大破之

袁州宜春開元戶二萬二千三百三十五鄉四十一鄉四十一

本秦九江郡地在漢為宜春縣屬豫章郡晉平吳後屬荊州東

晉以來屬江州隋開皇十一年置袁州因袁山為名大業三年

罷袁州為宜春郡武德五年討平蕭銑復置袁州

州境東西五百二十六里南北二百二十五里

八到西北至上都三千一百八十里西北至東都二千四百里

東至洪州七百四十里西至潭州五百二十六里

南至吉州三百一十七里北至江州五百六十五里

貢賦開元貢白紵布麻布

管縣三 宜春 新喻 萍鄉

宜春縣上郭下本漢舊縣灌嬰定江南所築城晉武帝太康元年

以太后諱春改為宜陽縣隋開皇十一年於縣置袁州移縣於

城東五里復改為宜春

新喻縣上西南至州一百五十里本漢宜春縣地吳孫皓分置新喻縣因

渝水為名天寶後相承作喻因聲變也

萍鄉縣上東至州一百四十二里本漢宜春縣地吳寶鼎二年分立萍鄉

先隸吉州隋開皇十一年屬袁州以地多生萍草因為名

信州上饒中元和戶二萬八千七百一十一鄉六十四

本漢餘汗縣地三國時又分鄱陽郡葛陽縣之地陳改為弋陽

今州所理在弋陽縣東一百里乾元元年租庸使洪州刺史元

載奏置州境

八到 西北至上都三千六百三十里
西北至東都二千八百二十里
東至衢州二百五十里
西北至饒州五百里
東南至建州五百里

貢賦 元和貢 縣 藤紙

管縣五 上饒 玉山 弋陽 永豐 貴溪

上饒縣 上郭下 本吳所置隋平陳省乾元元年重立

玉山縣 上郭下 西至 證聖元年分常山須江等縣置乾元元年自

衢州割入信州

弋陽縣 上郭下 東至 後漢分餘汗東界立葛陽縣自吳至陳並屬

鄱陽郡隋開皇中因失印改為弋陽縣乾元元年自饒州割屬

信州

永豐縣 中 西北至 本弋陽縣進賢鄉永豐里之地乾元元年

置因里為名

貴溪縣 上 東至州 永泰元年洪州觀察使李勉奏割樂平餘

干二縣置在貴溪口因為名

撫州 臨川 開元戶二萬四千九百八十八 鄉四十八

本禹貢揚州之境秦屬九江郡漢屬豫章吳太平中改置臨川

郡隋開皇九年改為撫州大業十二年又改為臨川縣武德五

年又改為州

州境 東西四百七十八里
南北六百三十里

八到 西北至上都三千三百五十里
北至東都二千四百九十五里
東至饒州四百七十里
西南至吉州四百五十六里
南至虔州一千一百八十里
北至洪州二百一十九里

貢賦 開元貢 葛十四
元和貢 葛十四

管縣四 臨川 南城 崇仁 南豐

臨川縣上郭下後漢和帝永元八年析南城縣為臨安縣開元九年改為臨川縣

南城縣上東南至州一百三十里漢分豫章郡立為南城縣

崇仁縣上東北至州一百里本漢臨汝縣之地吳少帝太平二年分臨

汝為新建縣屬臨川郡梁普通三年改為巴縣隋開皇中改為崇仁

南豐縣上西北至州二百六里本漢南城縣之地吳少帝分以為南豐縣

隋平陳省入南城景雲二年又置先天二年又廢開元八年復置

宣州宣城開元戶八萬七千二百三十一鄉一百六十七元利戶五萬七千三百五十鄉一百九十五今為宣歙觀察使理所

管州三 宣州 歙州 池州

縣二十 都管戶九萬一千七百六

禹貢揚州之域春秋時屬楚秦為郢郡漢武帝改為丹陽郡領縣十七理宛陵即今理是也漢有銅官輿地志云宛陵縣銅山者漢采銅所理也順帝立宣城郡東晉或理蕪湖或理姑熟或理赭圻隋開皇九年平陳改郡為宣州移於今理武德二年置總管府七年改為宣城郡乾元元年復為宣州州理城周封楚子熊繹於此漢丹陽郡亦理此城俗傳晉桓彝所築

州境東西四百八十六里南北五百五十二里西北至上都取和滁路三千一十里取潤州路三千七十八到里

西北至東都取和滁路二千一百五十里
正北至微東至潤州四百里
正北至微西至和州二百五十里
西南至池州三百四十里

正南微西餘嶺至歙州三百八十里

西渡江至廬州六百四十里

貢賦開元貢白紵布自貞元後常貢之外別進五色線毯及綾綺等珍物與淮

南兩浙相比

管縣十 宣城 南陵 涇 當塗 溧陽 溧水

寧國 廣德 太平 旌德

宣城縣望郭下本漢宛陵縣屬丹陽郡後漢順帝置至晉屬宣城

郡隋自宛陵移於今理

敬亭山州北十二里即謝朓賦詩之所

青弋水州西九十九里

南陵縣望東至本漢春穀縣地梁於此置南陵縣仍於縣理

置南陵郡隋平陳廢郡縣屬宣州

鵲頭鎮在縣西一百一十里即春秋時楚伐吳敗於鵲岸是也

沿流八十里有鵲尾洲吳時屯兵處

利國山在縣西一百一十里出銅供梅根監

梅根監在縣西一百三十五里梅根監并宛陵監每歲共鑄錢

五萬貫

銅井山在縣西南八十五里出銅

戰鳥山在縣西北一百二十里臨大江本名孤圻山昔桓溫於

赭圻討賊屯兵山下夜中眾鳥鳴賊謂官軍已至一時驚潰因

以為名

春穀故城在縣西一百五十里

赭圻故城在縣西北一百三十里西臨大江吳所置赭圻屯處

也晉哀帝時桓溫領揚州牧入朝參政自荊州還至赭圻詔止

之遂城赭圻鎮焉後城被火災乃移鎮姑孰

涇縣

緊東北至涇州一百五里

本漢舊縣因涇水以為名屬丹陽郡晉屬宣城郡武德七年於此置猷州八年廢以縣屬宣州

陵陽山在縣西南一百三十里陵陽子明得仙處

徽領山在縣東南二百五十里涇水所出也

蓋山在縣西南八十里下有舒姑泉昔舒氏女化為魚於此泉

間絃歌聲則有雙鯉湧出

原本西南下有二百二字

當塗縣

緊東南至州一百九十三里

本漢丹陽縣地其當塗縣本屬九江郡漢為侯國左傳禹會諸侯於塗山注云在壽春東北以塗山為

邑故以名焉晉武帝太康初分丹陽置于湖縣成帝時以江北

之當塗縣流人過江在于湖者僑立為當塗縣屬淮南郡隋大

業十年廢于湖縣以當塗屬宣州

牛渚山在縣北三十五里山突出江中謂之牛渚圻津渡處也

始皇二十七年東巡會稽道由丹陽至錢塘即從此渡也晉左

衛將軍謝尚鎮於此溫嶠至牛渚燃犀照諸靈怪亦在於此

博望山在縣西三十五里與和州對岸江西岸曰梁山在溧陽

縣南七十里兩山相望如門俗謂之天門山山上皆有卻月城

宋車騎將軍王玄謨所築於此屯兵捍禦

赤金山在縣北一十里出好銅與金類淮南子食貨志所謂丹

陽銅也

九井山在縣南一十里殷仲文九日從桓溫登九井賦詩即此

山也

龍山在縣東南十二里桓溫嘗與僚佐九月九日登此山宴集

丹陽湖在縣東南七十九里周迴三百餘里與溧水分湖為界

蕪湖水在縣西南八十里源出丹陽湖西北流入於大江漢末

湖側亦嘗置蕪湖縣吳將陸遜晉謝尚王敦皆嘗鎮此
姑熟水在縣南二里縣名因此

慈湖在縣北六十五里吳將卞融於此屯兵晉成帝咸和二年
陶侃與蘇峻戰於慈湖侯景之亂兵至慈湖梁人聞之大恐

采石戍在縣西北三十五里西接烏江北連建業城在牛渚山
上與和州橫江渡相對隋師伐陳賀若弼從此渡隋平陳置鎮

貞觀初改鎮為戍
溧陽縣緊西南至州二百四十里本漢舊縣屬丹陽郡以在溧水之陽為

名吳時置屯田於此隋屬蔣州今潤州上元縣西石頭城是蔣州理也又屬潤州
大業二年屬宣州

平陵山在縣南十八里晉成帝時李完圍韓晃於此山斬之山
高四十丈

溧水在縣南六里
溧水縣上南至州二百二十五里本漢溧陽縣地隋開皇十一年宇文述

割溧陽之西丹陽之東置
中山在縣東南一十五里出兔毫為筆精妙

丹陽湖在縣西南二十八里與當塗縣分中流為界
固城湖在縣南一百里周迴九十里多蒲魚之利

寧國縣上西北至州一百一十里本後漢末分宛陵南鄉置屬丹陽郡晉
屬宣城郡其後武德中廢天寶三年復置

五湖水在縣東北四里
廣德縣緊西至州一百六十五里後漢分故障縣置屬丹陽郡宋為經安

縣隋仁壽三年屬湖州大業二年移於今理屬宣州至德二年
改為廣德

桐汭水在縣西五十里春秋楚子期伐吳至桐汭是也

太平縣上 東北至州二百八十里 本涇縣地天寶四年宣城郡太守李和

上奏割涇縣西南十四鄉置

黃山在縣西南四十里上有泉水泉側多黃連

旌德縣上 北至州二百三十里 本太平之地以縣界闊遠永泰初土賊王

方據險作叛詔討平之奏分太平置旌德縣

歙州新安 開元戶三萬一千九百六十一 鄉七十二

禹貢揚州之域春秋時屬越秦時為丹陽郡歙縣之地其後或

屬新都或隸新安郡或立新寧郡隋開皇十二年置歙州武德

中置都督貞觀廢

州境 東西四百一十九里

八到 西北至上都取睦州路四千八百五里取宣州路三千四

百九十里 西北至東都三千三百二十五里取宣州潤州路二千五

東至杭州四百七十里

東至睦州三百七十里

西南至饒州七百里

正北微東至宣州三百里

貢賦 開元貢麻布 元和貢細紵布竹篔

管縣六 歙 黟 休寧 婺源 績溪 祁門

歙縣上 郭下 本秦舊縣也縣西有歙浦因以為名晉後屬新都郡

或屬新安郡或屬新寧郡隋初省開皇十一年又置歙州及縣

北黟山在縣西北二百六十八里宣歙二州分界處

布射山一名勤山在縣北二十里吳志歙賊金奇萬戶屯於此

烏聊山在縣東南二百六步上有毛甘故城後漢末賊毛甘萬

戶屯於此吳將賀齊討平之

浙江西自休寧縣界流入

黟縣上東至州一百五十二里本漢舊縣理在黟川因以為名屬丹陽郡

隋平陳省入休寧縣十一年復置隸宣州十二年改隸歙州按縣南有墨嶺出墨石又昔貢柿心木縣由此得名說文黟字从黑旁多後傳誤遂寫黟字

林厯山在縣西南一百五十里昔吳大帝使賀齊討黟歙山賊賊帥陳僕祖山等二萬戶屯此山四面壁立高數十丈徑路危狹不容方楯賊乘高下石不可得攻齊乃陰募輕健士密於隱險賊所不備處以戈拓斬山為緣道夜令勇士潛上懸布援人遂大破之忽賊中有善禁者官軍刀劍不得拔弓弩矢發多還自向賀齊令曰吾聞蟲有毒者兵有刃者可禁其無刃者不可禁乃多作靛木白楛選異力精卒五千人攻之禁果不行賊遂大敗

休寧縣上東至州六十六里本秦歙縣地屬丹陽郡後漢建安中賀齊討黟歙山賊分休陽縣置後頻有改易隋開皇九年改為休寧縣屬婺州十二年改屬歙州

橫鄣山在縣東南八十四里
漸江一名浙江源出縣東南橫鄣山東流經歙縣又東南入睦州界

婺源縣上東北至州二百九里本休寧縣西南界開元二十六年平妖賊洪氏始置此縣以婺水遠城三面因以為名

善山在縣南五十里與惡山隔溪相對俗謂之夫婦山

績溪縣中下西南至州六十六里本梁大通元年於此置梁安縣武德中廢大曆二年刺史長孫全緒奏分歙縣置此縣北有乳溪與徽溪相去一里並流離而復合有如績焉因以為名

祁門縣中下 東至州一百七十九里本古昌門地漢黟縣之南境永泰元年草賊方清於此偽置昌門縣以為守備刺史長孫全緒討平之因其舊城置縣恥其舊號以縣東北一里有祁山因改為祁門縣大曆五年又移於東面臨大溪西枕小山

池州池陽 元和戶一萬七千五百九十一 鄉三十四

本漢鄣郡之域吳於此置石城縣梁昭明太子以其水魚美故封其水為貴池今城西枕此水隋廢石城縣入南陵縣開皇中於此置秋浦縣永泰二年江西觀察使李勉奏置池州因武德四年總管左難當所奏舊名取貴池以為州號也

州境
八到西北至上都取宣州路三千四百一十里取江州路二千五百三十里
西北至東都取宣州路二千五百一十里取江州路二千五百三十里

東北陸路至宣州三百四十里
西至江州五百八十里
東南至歙州四百六十里
西南至饒州五百八十里
正北微西渡江至舒州四百三十里

貢賦

管縣四 秋浦 青陽 至德 石埭

秋浦縣上 隋開皇十九年於石城故城置屬宣州永泰二年李勉奏置池州縣屬焉

烏石山在縣西一百四十里廣德初為賊陳莊方清所據袁儉破平之

大江水在縣北七里

貴池水在縣西七里

秋浦水在縣西八十里

青陽縣上 西南至 本漢涇縣地天寶元年洪州都督徐輝奏

於吳所立臨城縣南置屬宣州在青山之陽為名永泰二年隸

池州

至德縣中 東北至州 本漢石城至德二年刺史宋若思奏置

因年號為名初屬潯陽郡乾元元年改屬饒州永泰三年割屬

池州

堯城在縣南四百里

舜城在縣北二十里舊傳兩帝南巡至此

石埭縣中 西北至 本漢丹陽郡地至吳大帝封韓當為石埭

城侯因此置縣其後屢有廢興永泰二年洪府都督李勉奏割

秋浦青陽涇三縣於吳所置陵陽城南五里置

陵陽山在縣北三十里竇子明於此得仙

石埭在縣西北一百二十里有兩橫石壅江有如埭焉因名

元和郡縣圖志卷第二十八終

元和郡縣圖志卷第二十九

唐 李吉甫 撰

江南道五

湖南觀察使 潭州 衡州 郴州 永州 連州 道州

邵州

福建觀察使 福州 建州 泉州 漳州 汀州

潭州 長沙 開元戶二萬一千八百 鄉六十九

中都督府 元和戶一萬五千四百四十四 鄉六十九

今為湖南觀察使理所

管州七 潭州 衡州 郴州 永州 連州 道州

邵州

縣三十四

禹貢荊州之域春秋時為黔中地楚之南境秦并天下分黔中

以南之沙鄉爲長沙郡以統湘川下言長沙郡地者皆禹貢按

東方胡記南郡有萬里沙祠自湘川至東萊地可萬里故曰長

沙漢初以吳芮有功封長沙王至景帝封其子發爲王因入朝

有詔諸王迭起舞王但張輿而已帝怪而問之對曰臣國小地

狹不足以回旋帝悅益以武陵桂陽二郡自漢至晉並屬荊州

懷帝分荊州湘中諸郡置湘州南以五嶺爲界北以洞庭爲界

漢晉以來亦爲重鎮今按其俗雜有夷人名徭自言先祖有功

免徭役也隋開皇九年平陳改爲潭州取昭潭爲名也又置總

管府大業中罷牧置都尉府三年罷爲長沙郡武德四年又置

潭州總管府七年改爲都督府

州境東西一千六十里
南北五百七十五里

入到西北至上都二千四百四十五里
北至東都二千一百八十五里

正南微東至衡州四百六十里

北至岳州水路五百五十里

東南至袁州五百二十五里

西北至朗州四百里

東至洪州九百八十里

貢賦開元貢 葛布十五匹
元和貢 絲布十五匹

管縣六 長沙 醴陵 瀏陽 益陽 湘鄉 湘潭

長沙縣緊郭下本漢臨湘縣屬長沙國隋改爲長沙縣屬潭州

嶽麓山在縣西南隔湘江水六里蓋衡山之足也故以麓爲名

雲母山在縣北九十里列仙傳長沙雲母服之不朽

銅山在縣北一百里楚鑄銅處

昭山在縣南七十里臨湘水下有旋潭甚深無底州之得名因

此也

湘水南自衡山縣界流入於岳州湘陰縣界

故尉城在縣西北七十里孫權以程普為長沙縣西部都尉以防關羽因立此城

故陶關在縣西南五里晉杜弢據湘州反陶侃討之因置此城賈誼宅在縣南四十步

吳芮墓在縣北四里

陶侃墓在縣南二十三里

醴陵縣中下西北至州一百八十里本漢臨湘縣地禹貢岷山導江東別為

沱又東至于醴是也後漢置此縣屬長沙郡吳封顧雍為長沙侯而家人不知是也隋平陳省入長沙武德四年復置

瀏陽縣中下西北至州二百五十里本漢長沙國臨湘縣地吳置瀏陽因縣

南瀏陽水為名隋平陳廢景龍二年復置

益陽縣上東南至州一百八十里本漢舊縣屬長沙國在益水之陽因名

隋平陳屬潭州

瀘水一名茱萸江南自邵州流入經縣南三十步縣西有關羽

瀘南對甘寧故壘昔羽屯兵水北孫權令魯肅甘寧拒於此水寧謂肅曰羽聞吾咳唾之聲必不敢渡渡則成擒也羽夜聞寧

處分曰興霸聲也遂不渡茱萸江

益水出縣東南益山東北流入瀘水

關羽故壘在縣西一十五里

湘鄉縣緊西北至州二百三十里本漢湘南縣之湘鄉也後漢立為縣屬

零陵郡自吳至陳並屬衡陽郡隋省入衡山縣武德四年復置石魚山其石色若雲母開發一重石若魚形刻畫燒之作魚膏

臭在縣西一十五里

龍山有鍾乳穴在縣南二百四十里

漣水在縣南四十五里煮水一石得鹽五升

湘潭縣緊東北至州一百四里陸路一百二十里本漢湘南縣地吳分立衡陽縣

晉惠帝更名衡山歷代並屬衡陽郡隋改屬潭州天寶八年改名湘潭

涓湖溉良田二百餘頃縣西七十里

湘水經縣理東

衡州衡陽開元戶一萬三千五百一十三鄉四十四元和中戶一萬八千四十七鄉四十四

秦屬長沙郡漢為酃縣地吳分長沙之東部為湘東郡晉以郡屬湘州隋開皇九年罷郡為衡州以衡山為名

州境東西六百五十里南北四百九十九里

八到西北至上都二千九百五十里東北至東都二千六百四十九里東北至吉州九百一十里東南至郴州三百七十里

東南至郴州三百七十里正南微西至永州五百七十里北至潭州四百六十里西至邵州三百五十六里

貢賦開元貢麩金大麻紵絲元和貢水銀

管縣六 衡陽 攸 茶陵 耒陽 常寧 衡山

衡陽縣緊郭下本漢酃縣地吳分置臨蒸縣屬衡山郡天寶初更名衡陽郡縣仍屬焉縣城東傍湘江北背蒸水

响嶺山即衡山也在縣北七十里

湘水西南自永州祁陽界入

蒸水自臨蒸縣北東注於湘謂之蒸口

酃湖在縣東二十里可釀為酒晉紀武帝平吳薦酃酒於太廟

是也

蒸陽故城在縣西一百七十里

是也

蒸陽故城在縣西一百七十里

攸縣下西南至州陸路三百四十五里本漢舊縣武德四年分湘潭縣置以北帶攸溪爲名

茶陵縣中西南至州水路四百五十里本長沙國界齊永明七年入湘東郡

隋開皇九年爲湘潭縣武德四年置茶陵縣貞觀九年廢聖曆元年復舊因南臨茶山縣以爲名

耒陽縣上西北至州一百六十八里本秦縣因耒水在縣東爲名漢屬桂陽

郡隋改爲耒陰屬衡州後漢蔡倫卽此縣人有宅基在縣西一里

雨瀨在故縣西南每旱賽之則雨降

常寧縣下西北至州陸路一百八十里本秦耒陽縣地吳分耒陽置新平縣

宋元徽中三洞蠻抄掠州縣移就江東因蠻寇止息遂號新寧卽今理是東府潭水西枕宜江天寶元年改名常寧

湘水在縣北六十里

衡山縣上西南至州一百二十里本漢陰山縣以縣東一百二十里有陰

山爲名至梁武帝天監中分陰山立湘潭縣天寶八年改爲衡山

湘水在縣東

衡山南嶽也一名岫嶺山在縣西三十里南嶽記曰衡山者朱陽之靈臺太虛之寶洞又云赤帝館其嶺祝融託其陽以其宿當翼軫度應機衡故爲名又曰上如車蓋及衡軛之形山高四千一十丈

衡嶽廟在縣西三十里南嶽記曰南宮四面皆絕人獸莫至周迴天險無得履者漢武帝移於江北置廟隋文帝復移於今所

郴州桂陽開元戶三萬二千一百七十六鄉五十元和中一萬六千四百三十七

本漢長沙國地後漢分長沙南境立桂陽郡理郴縣領十一縣
隋平陳改為郴州大業中復為桂陽郡武德四年為郴州

州境 東西五百九十六里
南北三百二十三里

八到 西北至上都三千二百七十五里
北至東都三千一百一十五里
西至道州五百三十五里
東至虔州一千里

東南至韶州四百一十里
西北至衡州三百七十里

貢賦 開元貢 細白紵
元和貢 細白紵

管縣八 郴 義章 義昌 平陽 資興 高亭

臨武 藍山

郴縣 上郭下 本漢舊縣項羽徙義帝之所都也歷代屬郴陽郡隋

屬郴州

桂陽監在城內每年鑄錢五萬貫

馬嶺山在縣東北五里昔蘇耽學道於此得仙其舊宅在城東
半里俯臨城餘跡猶存

石井山在縣東北八十里有風母獸既死張口向風則生

劉洞在縣西北二十三里出偃鼠如牛將為災乃出畎畝散落
其尾悉為小鼠

淶水自郴侯山注來

程鄉吳錄云程鄉出酒

橫溪水俗謂之貪泉飲者輒冒於貨財

郴水經縣東一里

溫水在縣北常溉田十二月種明年三月熟可一歲三熟

義帝祠在縣南一里墓在縣西一里

義章縣 中下 西北至州 一百一十五里 本漢郴縣地隋末蕭銑分置屬郴州

武德因而不改開元二十三年自縣北移於今理卻據層嶺前
臨通江

章水在縣北六十五里

義昌縣中下 西北至本漢郴縣地至東晉分置汝城縣屬桂

陽郡隋改為扈陽縣天寶元年改為義昌

平陽縣上 東至州 九十九里本漢郴縣地東晉陶侃於今理南置屬平

陽郡至陳俱廢隋末蕭銑分置武德因而不改七年省八年復
置

銀坑在縣南三十里所出銀至精好俗謂之倘子銀別處莫及
亦出銅鑛供桂陽監鼓鑄

資興縣中下 西至州 一百二十里本漢郴縣地後漢於此置漢寧縣吳改

曰陽安晉改為晉寧至隋省開皇十一年又置改為晉興貞觀

廢咸亨二年又置改為資興南俯耒江北帶長嶺

高亭縣中下 南至 州九十里本漢便縣晉省陳復置至隋省入郴縣開

皇十三年宇文融奏割郴縣北界置安陵縣安陵水在縣北一
百步因以為名天寶元年改為高亭縣以縣東一百三十步高

亭山為名

臨武縣中下 東北至州 二百一十三里本漢舊縣因南臨武溪水以為名歷

代屬桂陽郡後郡為郴州縣屬不改

桐柏山在縣西北六十里

雞水在縣南即桂水也

藍山縣中 東北至州 三百二十里本漢南平縣至隋廢咸亨中復置於今

理天寶元年改為藍山縣

九疑山在縣西南五十里

永州

零陵 開元戶二萬七千五百九十

鄉四十八

秦屬長沙郡漢為長沙國武帝分置零陵郡領縣十至宋封晉

恭帝為零陵王隋文帝開皇九年平陳置永州因水為名大業

三年復為零陵郡武德四年又置永州史記舜葬九疑即此也

州境

東西三百三十二里 南北五百六十一里

八到

西北至上都三千一百五十五里 北至東都二千八百九十五里 西南至桂陽五百五里 東北至衡州陸路五百七十里 西至敘州南郡溪山懸險不通無里數 東南至道州水路二百六十里 東至韶州六百里

東南至道州水路二百六十里 東至韶州六百里

貢賦

開元貢 細葛 石燕

管縣四 零陵 祁陽 湘源 灌陽

零陵縣上 本漢泉陵縣地隋平陳改為零陵縣自改零陵故

移於此

湘水經州西十餘里

石室山在縣北一里呂蒙所築

祁陽縣上 南至州 一百八十里 本漢泉陵縣地屬零陵郡吳分泉陵置武

德四年復置於今理貞觀元年省四年又置

石燕山在縣西北一百一十里出石燕充藥

湘水經縣南三十步

湘源縣上 東北至州 一百三十里 本漢洮陽縣地至隋改置湘源縣屬永

州

湘水經縣東

灌陽縣中 北至州 三百六十里 本漢零陵縣地隋大業末蕭銑析湘源縣

置武德七年廢上元二年呂誼奏置

灌水在縣西南一百二里

連州 連山 開元戶一萬八百八十 鄉二十二 元和戶五千二百七十 鄉二十二

秦為長沙郡之南境漢置桂陽郡至陳為桂陽縣隋文帝開皇十年置連州因黃連嶺為名大業初改為熙平郡武德四年復為連州

州境 東西二百四十二里 南北四百里

八到 西北至上都三千六百六十五里 東北至東都三千四百五里 東至韶州陸路五百里 西南至封州六百三十里 東至廣州八百九十里 西至賀州捷路二百七十里取道州桂嶺路三百六十里 東北度嶺至郴州三百九十里

貢賦 開元貢 細布 元和貢 鍾乳

管縣三 桂陽 陽山 連山

桂陽縣 郭上中 郭下 本漢舊縣屬桂陽郡吳宋齊並屬始興郡梁陳屬

陽山郡隋屬連州

貞女峽在縣東南一十里

黃連嶺在縣西南一百五十里

陽山縣 中下 西北至州水 路一百七十四里 本漢舊縣為南越置關之邑故其

關在縣西北四十里茂漢口史記尉佗移檄陽山關曰盜兵且至急絕道聚兵自守今陽山北當騎山嶺路秦於此立陽山關漢破南越以為縣後漢省晉重置在注水南梁天監六年置陽山郡以縣屬焉隋開皇十年屬連州神龍二年移於注水北即今縣理也是界諸山各出乳穴

連山縣 中下 東至州 一百六十里 自漢至齊為桂陽郡之地梁武帝分桂

陽置廣惠縣隋開皇十年改為廣澤屬連州仁壽元年改為連

山

滑水今為黃連水

道州

江華中

開元戶二萬七千四百四十元利戶一萬八千三百三十八

鄉六十一鄉五十一

秦屬長沙郡漢屬長沙國武帝分長沙置零陵郡吳分零陵置營陽郡今州是也以郡在營水之南因為名隋末陷寇賊武德

四年平蕭銑置營州貞觀八年改為道州

州境

東西二百九十五里南北四百里

八到

西北至上都三千四百一十五里北至東都三千一百五十五里

西北水路至永州二百六十里西南嶺至賀州四百四十里

正南嶺至韶州四百二十里正東微北至郴州五百三十五里

貢賦

開元貢細紵布元和貢細紵布

管縣五 弘道 永明 延唐 大曆 江華

弘道縣

郭下

本漢營浦縣屬零陵郡隋改永陽縣貞觀八年省入營道縣天寶六年改為弘道縣

大陽原在縣南五十步多小斑竹相傳云舜崩之後二妃尋湘水以手拭淚把竹遂成斑也

營水南自江華縣流入

永明縣

中東北至州一百一十里

本漢營浦縣隋改為永陽縣武德四年移於州西南貞觀八年省天后又置天寶元年改為永明

延唐縣

上西至州一百里

本漢泠道縣地屬零陵郡漢景帝時零陵文學於泠道舜祠下得玉琯十二是也至隋自奔巢水口移營道縣於此武德四年移營道於州郭內於此置唐興縣天寶元年改為延唐縣

九疑山在縣東南一百里舜所葬也九山相似行者疑惑故為

名舜廟在山下

冷水今名遲水源出九疑山

春陵故城在縣北五十里長沙定王封中子買為春陵侯是也

大曆縣中下西北至本漢營道縣地大曆二年觀察使韋之

晉奏析延唐縣於州東置因年號為名

江華縣中北至州一本漢馮乘縣地故城在縣南七十里至

隋不改武德四年分馮乘縣置江華縣屬營州八年屬道州

營水出縣東北

淮南王子廟在縣南七十二里荆州記云淮南王安被誅其子

奔至此城門化為石今名東塘神

邵州邵陽開元戶一萬二千三百二十一鄉三十一

秦為長沙郡地漢為昭陵縣屬零陵郡吳分置邵郡今州是也

宋齊並為邵陵王國隋開皇十年以邵陵郡屬潭州隋末陷於

寇賊武德四年平蕭銑屬南梁州貞觀十年改為邵州

州境東西屈曲一百二十里

八到西北至上都二千八百八十四里

北至東都二千五百八十五里

東北至潭州陸路五百三十里

東南至永州二百二十里

車至衡州三百五十六里

貢賦開元貢黃蠟 麻布

管縣二 邵陽 武岡

邵陽縣上郭下本漢昭陵縣屬長沙國後漢改昭陽縣晉武帝改

為邵陽在邵水之陽故名

武岡縣上東北至州本漢都梁縣地屬零陵郡吳寶鼎元年

改為武岡縣因武岡為名一云晉武帝分都梁縣置梁天監元

年以太子諱綱故為武彊武德四年復舊

都梁山在縣東北一百三十里

福州 長樂 開元戶三萬一千六十七 鄉六十六
中都督府 元和戶一萬九千四百五十五 鄉八十一

今為福建觀察使理所

管州五 福州 建州 泉州 漳州 汀州

縣二十四

禹貢揚州之域本閩越秦并天下以閩中下郡作三十六郡之數今州即閩中郡之地也 下言閩中地者皆禹貢揚州之域 漢初又為閩越國

自越王句踐六世至無彊為楚所滅子孫播遷海上七世至無諸從諸侯之師滅秦率人佐漢漢五年立無諸為閩中王王故

地郡又有冶縣按治即今台州章安故縣是也後漢改為東侯官吳於此立曲都尉主謫徙之人作船於此晉置晉安郡領

縣八屬揚州南朝以封子弟為王梁簡文帝初封晉安王入為皇太子是也陳廢帝改為豐州又為泉州因泉山為名隋大業

二年改為閩州三年改為建安郡武德六年改為泉州八年置都督府景雲二年又為閩州開元十三年改為福州都督府因

州西北福山為名兼置經略使仍自嶺南道割屬江南東路州境

八到 西北至上都五千二百九十五里

西北至東都四千四百二十四里

東北至溫州水路屈曲一千八百里山路險阻

西南至泉州三百七十里

正北微西至建州六百里

東南水路至海一百六十里

西南至汀州水路屈曲一千三百六十五里

東至大海七十里

貢賦 開元貢 海蛤 蚌蛇膽 賦 縣 絹

元和貢 乾薑 白蕉

管縣九 閩 侯官 長樂 福唐 連江 長溪

元和中貢 乾薑 白蕉

元和貢 乾薑 白蕉

元和貢 乾薑 白蕉

尤溪 古田 永泰

閩縣上郭下本漢冶縣地屬會稽郡後漢改為東侯官吳改屬建安郡晉以侯官為晉安郡隋開皇九年改為原豐縣十二年又改為閩縣皇朝因之

海在縣東南一百六十里

東湖在縣北三里

西湖在縣西二里

侯官縣緊北至州郭二里武德六年於今州西北三十一里置八年廢

長安二年重置貞元五年觀察使鄭叔則奏移於州郭

長樂縣上西至州一百里本隋閩縣地武德六年分置長樂縣以長安

樂為名

石尤嶺縣南四十里與福唐縣分界

大海在縣東七十里

海澶山縣東一百二十里山在大海中周迴三百里

福唐縣緊東北至州水路一百七十里聖曆二年析長樂縣東南界置萬安

縣天寶元年改名福唐

大海在縣東四十五里

丹步渡在縣南一百步其水謂之無患溪

連江縣緊西南至州水路一百六十里本漢冶縣地晉分立溫麻縣武德六

年移於連江之北改為連江縣

連江在縣南三百里東流入海

海在縣東五里

長溪縣中下西南至州水路八百里長安二年割晉溫麻舊縣北四鄉置長

溪縣

長溪在縣南四十五里流入大海

尤溪縣中下東南至開元二十九年開山洞置縣東水路沿

流至侯官縣西水路沂流至汀州龍巖縣

古田縣中下東至開元二十九年開山洞置東與連江接界

與沙縣分界

永泰縣中下東北至永泰二年觀察使李承昭開山洞置縣

東水路沿流至侯官縣西沂流至南安縣南北俱抵大山並無

行路

建州建安開元戶二萬八百鄉四十

本秦閩中地也漢於其地立冶縣屬會稽郡後漢改治為東侯

官吳孫休永安二年以會稽郡南部都尉分為建安郡今州即

其地也宋齊梁皆以封子弟為王開元十年罷郡以縣屬泉州

隋氏喪亂建安縣人擁眾自保武德四年歸附遂於建安縣置

建州

州境

八到西北至上都四千六百九十五里

西北至東都三千八百三十五里

正南微東至福州六百里

西北至信州五百四十里

西南至汀州水路屈曲一千五百里

東北至處州水路九百里

西北至撫州八百三十里

正北微東至衢州七百里

貢賦開元貢金花練焦葛布賦絲絹

管縣五 建安 浦城 邵武 將樂 建陽

建安縣上郭下本漢冶縣之地後改為東侯官又立建安縣遂因

不改

建陽溪一名建安水在州西四百步南流入福州界

浦城縣緊東南至州三百六十里本漢興縣吳永安三年改曰吳興隋平

陳省入建安武德四年又省載初元年復置改曰唐興天授二

年為武寧神龍元年復為唐興天寶元年改為浦城

梨嶺在縣東北八十里與弋陽縣分界

邵武縣上本漢治縣地吳於此立昭武縣晉改為邵武

飛猿嶺在縣西一百七十里

邵武溪水源出飛猿嶺東南流經縣西

將樂縣中下東北至吳永安三年置隋開皇九年省武德八

年復立

將樂溪水源出百丈嶺東北流經縣界

建陽縣中東至州一百六十里本上饒縣地吳分置建平縣晉太元四年

改為建陽隋開皇十年省入建安武德四年重置

建陽溪水源出縣北溫嶺南流經縣界

泉州清源開元戶五萬七百五十四鄉三十四

舊泉州本理在今閩縣武德六年置景雲二年改為閩州開元

中改為福州今泉州本南安縣也久視元年縣人孫師業訴稱

赴州遙遠遂於南安縣東北界置武榮州景雲二年改為泉州

即今理是也

州境東西四百里南北三百三十里

八到西北至上都五千六百九十五里西北至東都四千八百四十五里

東北至福州三百七十里東至大海一百里

西南至漳州三百五十里南至大海一百里

貢賦開元貢蠟燭賦紵布紵麻元和貢綿二十斤

管縣四 晉江 南安 莆田 仙游

晉江縣郭上開元六年刺史馮仁知緣州郭無縣請析南安縣東置在晉江之北因名

南安縣緊州東至八十里本漢台縣地後漢為侯官縣地晉為晉安縣地陳立為南安縣因縣南安江取以為名

海在縣東南九十里

莆田縣上西南至州一百五十里本南安縣地陳廢帝分置莆田縣隋開

皇十年省武德六年復置貞觀改隸閩州景雲二年割屬泉州大海在縣東一十五里

仙游縣中南至州一百六十里聖曆二年析莆田西界於今縣北十五里

置清源縣天寶元年改為仙游仍移於今理

仙游山在縣西三十里縣因以為名

漳州漳浦開元戶一千六百九十三鄉一十一

本泉州地垂拱二年析龍溪南界置因漳水為名初置於今漳浦縣西八十里開元四年改移就李澳川即今漳浦縣東二百步舊城是十二年自州管內割屬福州二十二年又改屬廣州二十八年又改屬福州乾元二年緣李澳川有瘴遂權移州於龍溪縣置即今州理是也

州境東西三百七十里南北三百九十里

八到西北至上都六千四百五十里西北至東都五千六百四十里東至大海一百五十里南至大海一百八十里

西北至潮州四百八十里

北至汀州九百里

貢賦開元貢 鯨魚皮 甲香 蠟

元和貢 鯨魚皮

管縣三 龍溪 漳浦 龍巖

龍溪縣中下陳分晉安縣置屬南安郡後屬閩州開元二十九

年割屬漳州縣東十五里至山險絕無路西二十里至山南三里至山北十六里至山

大海去縣五十四里

漳浦縣中下 東北至垂拱中析龍溪南界置

龍巖縣中下 東北先置在汀州界雜羅口名雜羅縣屬汀州

天寶元年改為龍巖縣大曆十二年皇甫政奏改隸漳州

廢懷恩縣在州西南三百一十里垂拱二年置屬漳州開元二

十九年廢今置鎮

汀州 臨汀 元和戶二千六百一十八 鄉一十一

開元二十一年福州長史唐循忠於潮州北廣州東福州西光

龍洞檢責得諸州避役百姓共三千餘戶奏置州因長汀溪以

為名

州境

八到 西北至上都取建州路六千二百九十五里

東北至福州水陸相兼屈曲一千三百六十里

東南至漳州水陸相兼一千五百里

正南微西至潮州一千三百五十里

西至虔州水陸相兼一千二百里

貢賦 開元貢 蠟 偃鼠皮

管縣三 長汀 沙 寧化

長汀縣中下 白石溪水在縣南二百步下流入潮州界

沙縣中下 西南至本宋置屬建安郡隋開皇十六年廢武德

四年又置屬建州開元二十三年割屬汀州因沙丘以為名

溪水自縣西來經縣郭東北流入建安溪

寧化縣中下 西南本沙縣地開元二十二年開山洞置縣西

與度化縣接

玄武山在縣北五里

元和郡縣圖志卷第二十九終

